

四庫全書

子部

欽定四庫全書

子部

御定書畫譜卷八

詳校官中書臣沈鳳輝

助教臣常循覆勘

覆校官中書臣田尹衡

校對官中書臣張垣

謄錄監生臣黃熙純

欽定四庫全書

御定佩文齋書畫譜目錄

第八卷

論書八 書品上

晉葛洪論書

宋羊欣采古來能書人名

宋王愔古今文字志目

南齊王僧虔論書

南齊王僧虔又論書

梁武帝古今書人優劣評

梁袁昂古今書評

梁陶弘景論楊許三仙君真蹟

梁庾肩吾書品

唐太宗王羲之傳論

唐李嗣真書後品

唐張懷瓘三品書斷

欽定四庫全書

御定佩文齋書畫譜卷八

論書八

書品上

晉葛洪論書

吳之善書者則有皇象劉纂岑伯然朱季平中州則有鍾元常胡孔明張芝索靖並用古體俱足周事飄乎若起鴻之乘勁風騰鱗之躡驚雲

抱朴子

宋羊欣采古來能書人名

齊王僧虔錄自秦至晉凡六十九人

臣僧虔啟昨奉勅須古來能書人名臣所知局狹不辨
廣悉輒條疏上呈羊欣所撰錄一卷尋索未得續更呈
聞謹啟

秦丞相李斯

秦中車府令趙高

右二人
善大篆

秦獄吏程邈善大篆得罪始皇囚於雲陽獄增減大篆
體去其繁複始皇善之出為御史名書曰隸書

扶風曹喜後漢人不知其官善篆隸篆小異李斯見師

一時

陳留蔡邕後漢左中郎將善篆隸採斯喜之法真定宜父碑文猶傳於世篆者師焉

杜陵陳遵後漢人不知其官善篆隸每書一座皆驚時人謂為陳驚座

上谷王次仲後漢人作八分楷法

師宜官後漢不知何許人何官能為大字方一丈小字方寸十言耿球碑是宜官書甚自矜重或空至酒家先

書其壁觀者雲集酒因大售俟其飲足削書而退

安定梁鵠後漢人官至選部尚書得師宜官法魏武重之常以鵠書懸帳中宮殿題署多是鵠手也

陳留邯鄲淳為魏臨淄侯文學得次仲法名在鵠後毛弘鵠弟子今祕書八分皆傳弘法又有左子邑與淳小異亦有名

京兆杜度為魏齊相始有草名

安平崔瑗後漢濟北相亦善草書平苻堅得摹崔瑗書

王子敬云極似張伯英瑗子寔官至尚書亦能草書

弘農張芝高尚不仕善草書精勁絕倫家之衣帛必先書而後練臨池學書池水盡墨每書云怱怱不暇草書人謂為草聖芝弟昶漢黃門侍郎亦能草今世云芝草者多是昶作也

姜詡梁宣田彥和及司徒韋誕皆英弟子並善草誕書最優誕字仲將京兆人善楷書漢魏宮館寶器皆是誕手寫魏明帝起凌雲臺誤先釘榜而未題以籠盛誕轆

轡長絙引之使就榜書之榜去地二十五丈誕甚危懼
乃擲其筆比下焚之乃誡子孫絕此楷法著之家令官
至鴻臚少卿誕子少季亦有能稱

羅暉趙襲不詳何許人與伯英同時見稱西州而矜許
自與衆頗惑之伯英與朱寬書自敘云上比崔杜不足
下方羅趙有餘

河間張超亦善草不及崔張

劉德昇善為行書不詳何許人

潁川鍾繇魏太尉同郡胡昭公車徵二子俱學於德昇而胡書肥鍾書瘦鍾有三體一曰銘石之書最妙者也二曰章程書傳祕書教小學者也三曰行狎書相聞者也三法皆世人所善繇子會鎮西將軍絕能學父書改易鄧艾上事皆莫有知者

河東衛覲字伯儒魏尚書僕射善草及古文略盡其妙草體微瘦而筆跡精熟覲子瓘字伯玉為晉太保採張芝法以覲法參之更為草藁草藁是相聞書也瓘子恒

亦善書博識古文

燉煌索靖字幼安張芝姊之孫晉征南司馬亦善草書
陳國何元公亦善草書

吳人皇象能草世稱沉著痛快

滎陽陳暢晉祕書令史善八分晉宮觀城門皆暢書也
滎陽楊肇晉荊州刺史善草隸潘岳誄曰草隸兼善尺
牘必珍足無輟行手不釋文翰動若飛紙落如雲肇孫
經亦善草隸

京兆杜畿魏尚書僕射子恕東郡太守孫預荊州刺史
三世善草藁

晉齊王攸善草行書

泰山羊忱晉徐州刺史羊固晉臨海太守並善行書

江夏李式晉侍中善寫隸草弟定子公府能名同式

晉中書郎李充母衛夫人善鍾法王逸少之師

瑯琊王廙晉平南將軍荊州刺史能章楷謹傳鍾法

晉丞相王導善藁行

廙從兄也

王恬晉中將軍會稽內史善隸書

導第二子也

王洽晉中書令領軍將軍衆書通善尤能隸行從兄羲

之云弟書遂不減吾

也恬弟也

王珉晉中書令善隸行

洽少子也

王羲之晉右將軍會稽內史博精羣法特善草隸羊欣

云古今莫二

庾兄子也

王獻之晉中書令善隸藁骨勢不及父而媚趣過之

羲之

第七子也兄玄之徽之兄子淳之並善草行

王允之衛軍將軍會稽內史亦善草行

舒子也

太原王濛晉司徒左長史能草隸子修瑯琊王文學善隸行與羲之善故殆窮其妙早亡未盡其美子敬每省修書云咄咄逼人

王綏晉冠軍將軍會稽內史善隸行

高平郗愔晉司空會稽內史善章草亦能隸郗超晉中

書郎亦善草

愔子也

潁川庾亮晉太尉善草行庾翼晉荊州刺史善隸行時

與羲之齊名

亮弟也

陳郡謝安晉太傅善隸行

高陽許靜民鎮軍參軍善隸草羲之高足

晉穆帝時有張翼善學人書寫羲之表表出經日不覺
後云幾欲亂真

會稽隱士謝敷胡人康昕並攻隸草

飛白本是宮殿題八分之輕者全用楷法吳時張弘好
學不仕常著烏巾時人號為張烏巾此人特善飛白能

書者鮮不好之

法書要錄

宋王愔古今文字志目

秦漢吳五十九人

李斯

程邈

胡毋敬

趙高

司馬相如

張敞

嚴延年

漢武帝

史游

劉向

孔光

爰禮

揚雄

陳遵

杜林

劉睦

衛宏

劉黨

曹喜

杜度

王次仲

班固

徐幹

賈逵

賈魴

左姬

許慎

崔瑗

唐綜

曹壽

崔寔

尹珍

羅暉

趙襲

張超

皇甫規妻

李巡

蔡邕

張芝

蘇班

劉德昇

師宜官

姜詡

梁宣

張昶

梁鵠

張紘

毛弘

左伯

魏武帝

邯鄲淳

衛覲

鍾繇

張昭

蘇林

張揖

胡昭

杜恕

諸葛融

魏晉五十八人

韋誕

張緝

郭伯通

韋熊

來敏

鍾會

諸葛瞻

皇象

何曾

傅玄

韋弘

辛曠

魏徵

陳暢

楊肇

岑泉

張弘

朱育

江偉

司馬攸

孫皓

杜預

滿爽

楊經

呂忱

衛恒

衛宣

裴興

索靖

牽秀

李韞

向泰

裴邈

張炳

張越

羊忱

荀爽

王廙

李式

羊固

辟閭訓

王導

庾翼

王濛

衛夫人

李廞

王恬

劉劭

王修

王洽

王羲之

張彭祖

謝安

郝愔

任靖

王獻之

王珣

桓玄

法書要錄

南齊王僧虔論書

宋文帝書自云可比王子敬時議者云天然勝羊欣功
夫少於欣

王平南廐右軍叔過江之前以為最

亡曾祖領軍書右軍云弟書遂不減吾變古制今唯右
軍領軍不爾至今猶法鍾張

亾從祖中書令書子敬云弟書如騎驪駸駸恒欲度驂
騶前

庾征西翼書少時與右軍齊名右軍後進庾猶不分在
荊州與都下人書云小兒輩賤家難皆學逸少書須吾
下當比之

張翼王右軍自書表晉穆帝令翼寫題後荅右軍當時
不別久後方悟云小子幾欲亂真

張芝索靖韋誕鍾會二衛並得名前代無以辨其優劣

惟見其筆力驚異耳

郗嘉賓草亞於二王緊媚過其父

桓玄自謂右軍之流論者以比孔琳之

謝安亦入能書錄亦自重為子敬書嵇康詩

羊欣書親授子敬行草猶善正乃不稱名

孔琳之書天然放縱極有筆力規矩恐在羊欣後丘道
護與羊欣俱面授子敬故當在欣後

范曄與蕭思話同師羊欣後小叛既失故步為復小有

異耳

蕭思話書羊欣之影風流趣好殆當不減筆力恨弱
謝綜書其舅云緊生起是得賞也恨少媚好謝靈運乃
不倫遇其合時亦得入流

賀道力書亞丘道護

康昕學右軍亦欲亂真矣

南齊書王僧虔傳

南齊王僧虔又論書

辱告並五紙舉體精雋靈奧執玩反覆不能釋手雖太

傳之婉媚翫好領軍之靜遜合緒方之蔑如也昔杜度
殺字甚安而筆體微瘦崔瑗筆勢甚快而結字小疏居
處二者之間亦猶仲尼方於季孟也夫工欲善其事必
先利其器伯喈非流紈體素不妄下筆若子邑之紙研
染輝光仲將之墨一點如漆伯英之筆窮神靜思妙物
遠矣邈不可追遂令思挫於弱豪數屈於陋墨言之使
人於邑若三珍尚存四寶斯覲何但尺素信札動見模
式將一字徑丈方寸十言也承天涼體豫復欲繕寫一

賦傾遲暉采心目俱勞承閱覽祕府備覩羣跡崔張歸
美於逸少雖一代所宗僕不見前古人之跡計亦無以
過於逸少既妙盡深絕便當得之實錄然觀前世稱目
竊有疑焉崔杜之後共推張芝仲將謂之筆聖伯玉得
其筋巨山得其骨索氏自謂其書銀鉤蠶尾談者誠得
其宗劉德昇為鍾胡所師兩賢並有肥瘦之斷元鳴獲
釘壁之玩師宜致酒簡之多此亦不能止長脗狸骨右
軍以為絕倫其功不可及繇此言之而向之論或至投

杖聊呈一笑不妄言耳

王僧虔集

梁武帝古今書人優劣評

鍾繇書如雲鵠游天羣鴻戲海行間茂密實亦難過
王羲之書字勢雄逸如龍跳天門虎卧鳳閣故歷代寶
之永以為訓

蔡邕書骨氣洞達爽爽如有神力

韋誕書如龍威虎振劒拔弩張

張芝書如漢武愛道憑虛欲仙

蕭子雲書如危峰阻日孤松一枝荆軻負劍壯士彎弓
雄人獵虎心胷猛烈鋒刃難當

羊欣書如婢作夫人不堪位置而舉止羞澀終不似真
蕭思話書如舞女低腰仙人嘯樹

李鎮東書如芙蓉出水文彩鏤金

王獻之書絕衆超羣無人可擬如河朔少年皆悉充悅
舉體沓拖而不可耐

索靖書如飄風忽舉驚鳥乍飛

王僧虔書如王謝家子弟縱復不端正奕奕皆有一種風流氣骨

程曠平書如鴻鵠高飛弄翅頡頏又如輕雲忽散乍見白日

李巖之書如鏤金素月屈玉自照

吳施書如新亭滄父一往見似揚州人共語語便態出顏禕書如貧家果實無妨可愛少乏珍羞

阮研書如貴胄失品不復排斥英賢

王褒書悽斷風流而勢不稱貌意深工淺猶未當妙
師宜官書如鵬翔未息翩翩而自逝

陶隱居書如吳興小兒形狀雖未成長而骨體甚峭快
鍾會書有十二意意外竒妙

蕭特書雖有家風而風流勢薄猶如羲獻安得相似
王彬之書放縱快利筆道流便

范懷約真書有力而草行無功故知簡牘非易

郝愔書得意甚熟而取妙特難疎散風氣一無雅素

柳惲書縱橫廓落大意不凡而德體未備

庾肩吾書畏懼收斂少得自充觀阮未精去蕭蔡遠矣
孔琳之書如散花空中流微自得

徐淮南書如南岡士大夫徒尚風軌殊不卑寒

袁崧書如深山道士見人便欲退縮

張融書如辯士對敵獨語不困行必會理

薄紹之書如龍游在霄繾綣可愛

書苑菁華

梁袁昂古今書評

王右軍書如謝家子弟縱復不端正者爽爽有一種風氣

王子敬書如河洛間少年雖皆充悅而舉體皆拖殊不耐

羊欣書如大家婢為夫人雖處其位而舉止羞澀終不似真

徐淮南書如南岡士大夫徒好尚風範終不免寒乞

阮研書如貴胄失品次叢悴不能復排突英賢

王儀同書如晉安帝非不處尊位而都無神明

庾肩吾書如新亭傖父一往見似揚州人共語便音態
出

陶隱居書如吳興小兒形容雖未成長而骨體甚駿快
殷鈞書如高麗使人抗浪甚有意氣姿韻終乏精味

袁崧書如深山道士見人便欲退縮

蕭子雲書如上林春花遠近瞻望無處不發

曹喜書如經論道人言不可絕

崔子玉書如危峰阻日孤松一枝有絕望之意

師宜官書如鵬羽未息翩翩自逝

韋誕書如龍威虎振劒拔弩張

蔡邕書骨氣洞達爽爽有神

鍾會書字十二種意意外殊妙實亦多奇

邯鄲淳書應規入矩方員乃成

張伯英書如漢武帝愛道憑虛欲仙

索靖書如飄風忽舉驚鳥乍飛

梁鵠書如太祖忘寢觀之喪目

皇象書如歌聲繞梁琴人捨徽

衛恒書如插花美女舞笑鏡臺

孟光祿書如崩山絕崖人見可畏

李斯書世為冠蓋不易施平

張芝驚竒鍾繇特絕逸少鼎能獻之冠世四賢共類洪

芳不減羊真孔草蕭行范篆各一時絕妙

右二十五人自古及今皆善能書奉勅遣臣評古今書

臣既愚短豈敢輒量江海但聖主委臣斟酌是非謹品
字法如前伏願照覽謹啟普通四年二月五日內侍中
尚書令袁昂啟

勅旨具之如卿所評臣謂鍾繇書意氣密麗若飛鴻戲
海舞鶴游天行間茂密實亦難過蕭思詒書走墨連縣
字勢屈強若龍跳天門虎臥鳳閣薄紹之書字勢蹉跎
如舞女低腰仙人嘯樹乃至揮豪振紙有疾閃飛動之
勢臣淺見無聞暗於明滅寧敢謬量山海以聖命自天

不得斟酌過失是非如獲湯炭

法書要錄

梁陶弘景論楊許三仙君真跡

楊君書最工不今不古能細能大大較雖祖效邴法筆

力規矩兼於二王

楊君名義晉人見寶泉述書賦

許掾書乃是學楊而

字體勁利偏善為寫經畫符與楊相似鬱勃鋒勢殆非
人功所逮長史章草乃能正書古拙隱居昔見張道恩
善別法書歎其神識今睹三君之迹一字一畫皆望影
懸了自善思非智藝所及特天假此鑒令有以顯悟爾

真誥

梁庾肩吾書品

玄靜先生曰予徧求邃古逖訪厥初書名起於玄洛字
勢發於倉史故遺結繩取諸文象諸形會諸人事未有
廣此緘滕深茲文契是以一畫加大天尊可知二力增
土地卑可審日以君道則字勢員月以臣輔則文體缺
及其轉注假借之流指字會意之類莫不狀範毫端形
呈字表開篇玩古則千載共朝削簡傳今則萬里對面

記善則惡自削書賢則過必改玉歷頒布仰政而化俗
帝載陳言待文而設教變通不極日用無窮與聖同功
參神並運爰洎中葉舍繁從省漸失潁川之言竟逐雲
陽之字若乃鳥跡孕於古文壁書存於科斗符陳帝璽
摹調蜀漆署表宮門銘題禮器魚遊舍鳳鳥已分蟲仁
義起於麒麟威形發於龍虎雲氣時飄五色仙人還作
兩童龜若浮溪蛇如赴穴流星疑燭垂露似珠芝英轉
車飛白掩素參差倒薤既思種柳之謠長短懸針復想

定情之製蚊脚傍低鵠頭仰立填飄板上繆起印中波
回墮鏡之鸞楷顧雕陵之鵠並以篆籀重複見重昔人
或巧能售酒或妙令鬼哭信無味之奇珍非趨時之急
務且具錄前訓今不復兼論惟草正疏通專行於世其
或繼之者雖百代可知尋隸體發源秦時隸人下邳程
邈所作始皇見而重之以奏事繁多篆字難製遂作此
法故曰隸書今時正書是也草聖起於漢時解散隸法
用以赴急本因草創之義故曰草書建初中京兆杜操

始以善書知名今之草書是也余自少迄長留心茲藝
敏手謝於臨池銳意同於削板而戢山之扇竟未增錢
凌雲之臺無因誠予求諸故迹或有淺深輒刪善草隸
者一百二十八人伯英以稱聖居首法高以追駿處末
推能相越小例而九引類相附大等而三復為略論總
名書品

張芝伯英

鍾繇元常

王羲之逸少

右三人上之上

論曰隸既發源秦史草乃激流齊相

跨七代而彌遵將千載而無革誠開博者也均其文總
六書之要指其事籠八體之奇能拔篆隸於繁蕪移楷
真於重密分行紙上類出繭之蛾結畫篇中似聞琴之
鶴峰峯間起瓊山慚其斂霧漪瀾遞振碧海媿其下風
抽絲散水定其筆下倚刀較尺驗於字中真草既分於
星芒烈火復成於珠佩或橫牽豎掣或濃點輕拂或將
放而更留或欲挑而還置敏思藏於胸中巧態發於豪
鉅詹尹端策故以迷其變化英韶傾耳無以察其音聲

殆善射之不注妙斲輪之不傳是以鷹爪舍利出彼兔
豪龍管潤霜游茲蠆尾學者鮮能具體窺者罕得其門
若探妙測深盡形得勢煙華落紙將動風彩帶字欲飛
疑神化之所為非人世之所學惟張有道鍾元常王右
軍其人也張工夫第一天然次之衣帛先書稱為草聖
鍾天然第一工夫次之妙盡許昌之碑窮極鄴下之牘
王工夫不及張天然過之天然不及鍾工夫過之羊欣
云貴越羣品古今莫二兼撮衆法備成一家若孔門以

書三子入室矣允為上之上

崔瑗子玉

杜度伯度

師宜官

張昶文舒

王獻之子敬

右五人上之中

論曰崔子玉擅名北中跡罕南度世

有得其摹書者王子敬見之稱美以為功類伯英杜度
濫觴於草書取奇於漢帝詔後奏事皆作草書師宜官
鴻都為最能大能小文舒聲劣於兄時云亞聖子敬泥
帚最驗天骨兼以製筆復識人工一字不遺兩葉傳妙

此五人允為上之中

索靖幼安

梁鵠孟皇

韋誕仲將

皇象休明

胡昭孔明

鍾會士季

衛瓘伯玉

荀爽長脗

阮研文機

右九人上之下

論曰幼安斂蔓舅氏抗名衛令孟皇

功盡筆勢字入帳中仲將不妄染墨必須張筆而左紙
孔明洞見模楷皆謂胡肥而鍾瘦休明斟酌二家聯駕
八絕士季之範元常猶子敬之稟逸少而工拙兼效真

草皆成伯玉遠慕張芝近參父迹長肩狸骨方擬而難
迨阮研居今觀古盡窺衆妙之門雖復師王祖鍾終成
別構一體此九人允為上之下

張超子並

郭伯通

劉德昇君嗣

崔寔子真

衛夫人茂猗

李式景則

庾翼稚恭

郗愔方回

謝安安石

王珉李琰

桓玄敬道

羊欣敬元

王僧虔

孔琳之彥琳

殷鈞李和

右十五人中之上 論曰子並崔家州里頗相倣效可
謂醬鹹於鹽冰冷於水伯通府問朝廷遠封其跡德昇
之妙鍾胡各採其美子真俊才門法不墜李妻衛氏自
出華宗景則豪素流靡稚恭聲彩邁越郝惜安石草正
並驅李琰桓玄筋力俱駿羊欣早隨子敬最得王體孔
琳之聲高宋氏王僧虔雄發齊代殷鈞頗耽著愛好終
得肩隨此一十五人允為中之上

魏武帝

孫皓吳主

衛覬伯儒

左伯子邑

衛恒巨山

杜預元凱

王廙世將

張彭祖

任靖

韋旭文休

王循敬仁

張永景初

范懷約

吳休尚

施方泰

右十五人中之中

論曰魏主筆墨雄贍吳主體裁鯨

密伯儒兼敘隸草子邑分鑣梁邯巨山三世元凱累葉

王廙為右軍之師彭祖取羲之道任靖矯名文休題

柱敬仁清舉致畏偈之詞張范逢時俱東南之美施吳

鄴下後生同年拔萃此一十五人允為中之中

羅暉叔景

趙襲元嗣

劉輿

張昭子布

陸機士衡

朱誕

王導茂和

庾亮元規

郗超景興

張翼君祖

康昕君明

王洽敬和

宋文帝

徐希秀

謝朓玄暉

劉繪士章

陶弘景通明

王崇素

右十八人中之下

論曰叔景元嗣並稱西州劉輿之

筆札張昭之無懈陸機以弘才掩迹朱誕以偏藝流聲
王導則列聖推能庾亮則羣公挹巧王洽以並通諸法
郝超以晚年取譽張翼善效宋帝康昕希秀孤生謝朓
劉繪文宗書範近來少前陶隱居仙才翰采拔於山谷
王崇素靡倫篇筆傳於里閭此一十八人允為中之下

姜翊

梁宣

魏徵文成

韋秀

鍾興

向泰

羊忱

晉元帝

識道人

范曄

宗炳

謝靈運

蕭思話

薄紹之

齊高帝

庾黔婁子貞
費元瑤

孫奉伯玉

王薈敬文
羊祜叔子

右二十人下之上
論曰此二十人並擅豪翰動成楷
則殆逼前良見希後彥允為下之上

陽經

諸葛融

楊潭

張炳

岑淵

裴興

王濟

李夫人

劉穆之道和

朱齡石伯兒

庾景休

張融思光

褚元明

孔敬通

王籍文海

右十五人下之中

論曰此十五人雖未窮字奧書尚

文情披其叢薄非無香草視其涯岸時有潤珠故能遺
斯紙以為世玩允為下之中

衛宣

李韞

陳基

傅廷堅

張紹

陰光

韋雄少季

張暢

曹仕

宋嘉

裴邈

楊固

傅夫人

辟閭訓

謝晦宣明

徐羨之宗文

孔閭

顧寶光

周仁皓

張欣太

張熾

僧岳道人

法高道人

右二十三人下之下 論曰二十三人皆五味一和五

色一彩視其雕文非特刻鵠觀其下筆寧止追嚮遺跡

見珍餘芳可折誠以驅馳並駕不逮前鋒而中權後勁
各盡其美允為下之下

今以九例該此衆賢猶如玄圃積玉炎州聚桂其中實
相推謝故有茲多品然終能振此鱗翼俱上龍門儻後
之學者更隨點曝云爾

庾度文集

唐太宗王羲之傳論

書契之興肇乎中古繩文鳥跡不足可觀末代去樸歸
華舒牋點翰爭相誇尚競其工拙伯英臨池之妙無復

餘蹤師宜懸帳之奇罕有遺蹟逮乎鍾王以降略可言
焉鍾雖擅美一時亦為迴絕論其盡善或有所疑至於
布纖濃分疎密霞舒雲卷無所間然但其體則古而不
今字則長而逾制語其大量以此為瑕獻之雖有父風
殊非新巧觀其字勢疎瘦如隆冬之枯樹覽其筆蹤拘
束若嚴家之餓隸其枯樹也雖槎枿而無屈伸其餓隸
也則羈羸而不放縱兼斯二者固翰墨之病歟子雲近
世擅名江表然僅得成書無丈夫之氣行行若紫春蚓

字字如綰秋蛇臥王濛於紙中坐徐偃於筆下雖禿千
兔之翰聚無一豪之筋窮萬穀之皮斂無半分之骨以
茲播美非其濫名邪此數子者皆譽過其實所以詳察
古今研精篆素盡善盡美其惟王逸少乎觀其點曳之
工裁成之妙煙霏露結狀若斷而還連鳳翥龍蟠勢如
斜而反直翫之不覺為倦覽之莫識其端心慕手追此
人而已其餘區區之類何足論哉

晉書

唐李嗣真書後品

昔倉頡造書天雨粟鬼夜哭亦有感矣蓋德成而上謂
仁義禮智信也藝成而下謂禮樂射御書數也吾作詩
品猶希聞偶合神交自然冥契者是才難也及其作書
評而登逸品數者四人故知藝之為未信也雖然若超
吾逸品之才者亦當竄絕終古無復繼作也故斐然有
感而作書評雖不足以對揚王休弘闡神化亦名流之
美事耳與夫飽食終日博奕猶賢不其遠乎項籍云書
足以記姓名此狂夫之言也嗟爾後生既乏經國之才

又無干城之略庶幾勉夫斯道近代虞祕監歐陽銀青
房褚二僕射陸學士王家令高司衛等亦並由此術無
所間然其中亦有更無他技而俯拾朱紱如此則雖慙
君子之盛烈苟非莘野之器箕山之英亦何能作誠凌
雲之臺拂衣碑石之際邪今之馳騫去聖逾遠徒識方
員而迷點畫亦猶莊生之歎盲者易象之談日中終不
見矣太宗與漢王元昌褚僕射遂良等皆授之於史陵
褚首師虞後又學史乃謂陵曰此法更不可教人是其

妙處也陸學士東之受於虞祕監虞祕監受於永禪師
皆有法體今人都不聞師範又自無鑒局雖古跡昭然
永不覺悟而執燕石以為寶玩楚鳳而稱珍不亦謬哉
其議論品藻自王愔以下王僧虔袁庚諸公已言之矣
而或理有未周今採諸家之善聊措同異以貽諸好事
其前品已定則不復銓列素未曾入有可措者亦復云
爾太宗高宗皆稱神札吾所伏事何敢寓言始於秦氏
終於唐世凡八十一人分為十等

李斯 小篆

右李斯小篆之精古今妙絕秦望諸山及皇帝玉璽猶夫千鈞強弩萬石洪鐘豈徒學者之宗匠亦是傳國之遺寶

張芝 章草

鍾繇 正書

王羲之 三體及飛白

王獻之 草行書半草行書

右四賢之迹揚庭効伎策勲底績神合契匠冥運天矩皆可稱曠代絕作也而鍾張筋骨有餘膚肉未贍逸少

加減太過朱粉無設同夫披雲覩日芙蓉出水求其盛
美難以備諸然伯英章草似春虹飲澗落霞浮浦又似
沃霧沾濡繁霜搖落元常正隸如郊廟既陳俎豆斯在
又比寒澗閣豁秋山嵯峨右軍正體如陰陽四時寒暑
調暢巖廊宏敞簪裾肅穆其聲鳴也則鏗鏘金石其芬
郁也則氤氲蘭麝其難徵也則縹緲而已仙其可覲也
則昭彰而在目可謂書之聖也若草行雜體如清風出
袖明月入懷瑾瑜爛而五色黼黻摛其七采故使離朱

喪晶子期失聽可謂草之聖也其飛白也猶夫霧縠卷舒煙空照灼長劒耿介而倚天勁矢超騰而無地可謂飛白之仙也又如松巖點黛蒨鬱而起朝雲飛泉漱玉灑散而成暮雨既離方以遁員亦非絲而異帛趣長筆短差難縷陳子敬草書逸氣過父如丹穴鳳舞清泉龍躍倏忽變化莫知所自或蹴海移山翻濤簸嶽故謝安石謂公當勝右軍誠有害名教亦非徒語耳而正書行書如田野學士越參朝列非不稽古憲章乃時有失體

處舊說稱其轉妍去鑒疎矣然數公皆有神助若喻之
制作其猶雅頌之流乎

評曰元常每點多異羲之萬字不同後之學者恐徒傷
筋臂耳然右軍肇變古質理不應減鍾故云或謂過之
庾翼每不服逸少曾得伯英十紙喪亂遺失常恨妙迹
永絕及後見逸少與亮書乃曰今見足下荅家兄書煥
若神明頓還舊觀方乃大服羲之又曾書壁而去子敬
密拭之而更別題右軍還觀之曰吾去時真大醉子敬

乃心服之矣然右軍終無敗累子敬往往失落及其不失則神妙無方可謂草聖也

贊曰倉頡造書鬼哭天廩史籀堙滅陳倉籍甚秦相刻銘爛若舒錦鍾張羲獻超然逸品

上上品二人

程邈

隸

崔瑗

小篆

右程君首創隸則規範煥於丹青崔氏爰效李斯點畫皆如鐵石傳之後裔厥功亦茂此外鐫勒去之無乃賈

乎若按之文章則三都二京之比也

上中品七人

蔡邕

索靖

梁鵠

鍾會

衛瓘

韋誕

皇象

右自王崔以降更無超越此數君梁氏石書雅勁於韋
蔡皇衛草迹殆亞於二王鍾索遺跡雖少吾家有小鍾
正書洛神賦河南長孫氏雅所珍好用子敬草書數紙

易之索有月儀三章觀其趣況大為適疎無愧珪璋特達猶夫聶政相如千載凜凜為不亡矣又毋丘興碑云是索書比蔡石經無相假借蔡公諸體惟有范巨卿碑風華豔麗古今冠絕王簡穆云無可以定其優劣此亦何勞品書者乎

上下品十二人

崔寔

章草

郝鑒

王廩

衛夫人

正書

王洽

郝愔

李式

庾翼

羊欣

歐陽詢

虞世南

褚遂良

右逸少謂領軍弟書不減吾吾觀可者有數十紙信佳
作矣體裁用筆全似逸少虛薄不倫右軍藻鑒豈當虛
發蓋欲假其名譽耳措之中下豈所謂允僉望哉崔衛
素負高名王庾舊稱拔萃崔章草甚妙衛正體尤絕世
將楷則遠類羲之猶有古制稚恭章草頗推筆力不謝
子真郝李超邁過於羊欣歐陽草書難於競爽如旱蛟

得水兔兔走穴筆勢恨少至於鐫勒及飛白諸勢如武庫矛戟雄劍欲飛虞世南蕭散灑落真草惟命如羅綺嬌春鵝鴻戲沼故當子雲之上褚氏臨寫右軍亦為高足豐豔雕刻盛為當今所尚但恨乏自然功勤精悉耳評曰蟲篆者小學之所宗草隸者士人之所尚近代君子多好之或時有可觀耳然許靖之迹殆不減小令常歎曰鍾書初不留意試作之乃不可得研之彌久如有髣髴乃知有畫龍之感耳安可厚誣乎此羣英允居上

流三品其中銓鑒不無優劣

贊曰程邈隸體崔公篆勢梁李蔡索邠皇韋衛羊習獻
規褚傳羲制邈乎天壤光厥來裔

中上品七人

張昶

衛恒

杜預

張翼

郝嘉賓

阮研

漢王元昌

右文舒西嶽碑但覺妍冶殊無骨氣庾公置之七品張

翼代羲之草奏雖曰小人幾乎亂真更乃編之乙科涇渭混淆故難品會至於衛杜之筆流傳多矣縱任輕巧流轉風媚剛健有餘便媚詳雅諒少儔匹嘉賓與王庾相埒是則高手顏黃門有言阮交州蕭國子陶隱居各得右軍一體故稱當時之冠絕然蕭公力薄終不迨阮漢王作獻之氣勢或如舞劍往往鄰幾

中中品十二人

謝安

康昕

桓玄

丘道護

許靜

蕭子雲

陶弘景

釋智永

劉珉

房玄齡

陸柬之

王知敬

右謝公縱任自在有螭盤虎踞之勢康昕巧密精勤有
翰飛鶯哢之體桓玄如驚蛇入草鉅鋒出匣劉珉比顛
波赴壑狂澗爭流隱居穎脫得書之筋髓如麗景霜空
鷹隼初擊道護謬登高品迹乃浮漫陸柬之學虞草體
用筆則青出於藍故非子雲之徒子雲正隸功夫恨少

不至高絕也智永精熟過人惜無奇態矣房司空含文
抱質王家令碎玉殘金房如海上雙鷁王比雲間孤鶴
中下品七人

孫皓

張超

謝道韞

宗炳

宋文帝

齊高帝

謝靈運

右孫皓吳人酣暢驕其家室雖欲矜豪亦復平矣張如
郢中少年乍入京輦縱有才辯蓋亦可知謝韞是王凝

之之妻雍容和雅芬馥可玩宋帝有子敬風骨超縱狼籍翕煥為美康樂往往驚道齊帝時時合興知慕韓彭之豹變有異張桓之拾青宗炳放逸屈懾頗數康許量其直置孤梗是靈運之流也

評曰古之學者皆有規法今之學者但任冒懷無自然之逸氣有師心之獨任偶有能者時見一斑忽不悟者終身瞑目而欲乘款段度越驂騑斯亦難矣吾當告勉夫後生然自古歎知音者希可謂絕絃也

贊曰西嶽張昶江東阮研銀鷹貞白鐵馬桓玄衛杜花
散安康綺鮮元昌東之名後身先

下上品十三人

陸機

袁崧

李夫人

謝朓

庾肩吾

蕭綸

王褒

斛斯彥明

錢毅

房彥謙

殷令名

張大隱

蘭靜文

右士衡以下時然合作踳駁不倫或類蚌質珠胎乍比
金沙銀礫陸平原李夫人猶帶古風謝吏部庾尚書創
得今韻邵陵王王司空是東陽之亞房司隸張益州參
小令之體蘭生正書甚為鮮緊亦有規則錢氏小篆飛
白寬博敏麗太宗貴之斛斯筆勢咸有由來司隸宛轉
頗稱流悅皆著名矣殷氏擅聲題榜代有其人嗟乎有
天才者或未能精之有神骨者則其功夫全棄但有佳
處豈忘存錄

下中品十人

范曄

蕭思話

張融

梁簡文帝

劉逖

王晏

周顒

王崇素

釋智果

虞綽

右范如寒雋之士亦不可棄蕭比遁世之夫時或堪採
思光要自標舉蓋無足裒簡文拔羣貴勝猶難繼作劉
黃門落花從風王中書奇石當徑彥倫意則甚高迹少

俊銳崇素時象麗人之姿智果頗似委巷之質虞綽鋒
穎迅健亦其次矣

下下品七人

劉穆之

褚淵

梁武帝

梁元帝

陳文帝

沈君理

張正見

右數君亦稱筆札多類效顰猶枯林之春秀一枝比衆
石之孤生片琰就中彥回輕快練倩有力孝元風流君

理放任亦後來之所習非先達之所營吾黨論書有異於是

評曰前品云蕭思話如舞女迴腰仙人嘯樹則亦曰佳矣又云張伯英如漢武學道憑虛欲仙終不成矣商摧如此不亦謬乎吾今品藻亦未能至當若其顛倒衣裳白圭之玷則庶不為也後來君子儻為鑒焉

贊曰蚌質懷珠銀鋼蘊礫陸謝參蹤蕭張繼迹思話仙才張融賞擊如彼枯秀衆多羣石

法書要錄

唐張懷瓘三品書斷

我唐四聖高祖神堯皇帝太宗文武聖皇帝高宗天皇
大聖皇帝鴻猷大業列乎冊書多才能事俯同人境翰
墨之妙資以神功開草隸之規模變張王之今古盡善
盡美無得而稱今天子神武聰明制同造化筆精墨妙
思極天人或頌德銘勲函耀金石或恩崇惠縛載錫侯
王赫矣光華懸諸日月非區區小臣所敢揚述

神品二十五人

大篆一人

史籀

籀文一人

史籀

小篆一人

李斯

八分一人

蔡邕

隸書三人

鍾繇

王羲之

王獻之

行書四人

王羲之

鍾繇

王獻之

張芝

章草書八人

張芝

杜度

崔瑗

索靖

衛瓘

王羲之

王獻之

皇象

飛白三人

蔡邕

王羲之 王獻之

草書三人

張芝

王羲之 王獻之

妙品九十八人

古文四人

杜林

衛密

邯鄲淳 衛恒

大篆四人

李斯

趙高

蔡邕

邯鄲淳

小篆五人

曹喜

蔡邕

邯鄲淳 崔瑗

衛瓘

八分九人

張昶

皇象

邯鄲淳 韋誕

鍾繇

師宜官

梁鵠 索靖

王羲之

隸書二十五人

張芝

鍾會

蔡邕

邯鄲淳

衛瓘

韋誕

荀爽

謝安

羊欣

王洽

王珉

薄紹之

蕭子雲

宋文帝

衛夫人

胡昭

曹喜

謝靈運

王僧虔

孔琳之

陸東之

褚遂良

虞世南

釋智永

歐陽詢

行書十五人

劉德昇 衛瓘 王珉 謝安

王僧虔 胡昭 鍾會 孔琳之

虞世南 阮研 王洽 羊欣

薄紹之 歐陽詢 陸柬之

章草八人

張昶 鍾會 韋誕 衛恒

郗愔 張華 魏武帝 釋智永

飛白五人

蕭子雲

張弘

韋誕

歐陽詢

王廙

草書二十二人

索靖

衛瓘

嵇康

張昶

鍾繇

羊欣

孔琳之

虞世南

薄紹之

鍾會

衛恒

荀爽

桓玄

謝安

張融

阮研

王珣

王洽

謝靈運

王僧虔

歐陽詢 釋智永

能品一百七人

古文四人

張敞

衛覬

衛瓘

韋昶

大篆五人

胡昭

嚴延年

韋昶

班固

歐陽詢

小篆十二人

衛覬

班固

皇象

張宏

許慎

韋誕

傅玄

蕭子雲

劉紹

張弘

范曄

歐陽詢

八分三人

毛弘

左伯

王獻之

隸書二十三人

衛恒

張昶

王廙

庾翼

郗愔

王濛

衛覬

張彭祖

阮研

陶弘景

王修

王褒

王恬

李式

傅玄

楊肇

王承烈

庾肩吾

薛稷

孫過庭

高正臣

釋智果

盧藏用

行書十八人

宋文帝

司馬欣

釋智永

蕭子雲

蕭思話

齊高帝

陶弘景

漢王元昌

王導

王承烈

孫過庭

高正臣

裴行儉 王智敬 王修 盧藏用

薛稷 釋智果

章草十五人

羅暉 趙襲 徐幹 庾翼

張超 王濛 衛覲 崔寔

蕭子雲 杜預 陸柬之 歐陽詢

王承烈 王知敬 裴行儉

飛白一人

劉紹

草書二十五人

王導

何曾

楊肇

郗愔

庾翼

司馬攸

李式

宋文帝

蕭子雲

陸柬之

宋令文

齊高帝

謝朓

庾肩吾

蕭思話

范曄

孫過庭

梁武帝

王知敬

裴行儉

釋智果

盧藏用

高正臣

王廙

王愔

右包羅古今不越三品工拙倫次殆至數百且妙之企神非徒步驟能之仰妙又甚規隨每一書之中優劣為次一品之內復有兼并至如神品則李斯杜度崔瑗皇象衛瓘索靖各惟得其一史籀蔡邕鍾繇得其二張芝得其三逸少父子並各得其五考多之類少妙之況神又上下差降昭然可悉也他皆倣此十書之外乃有龜蛇麟虎雲龍蟲鳥之書既非世要悉所不取也

評曰蓋一味之嗜五味不同殊音之發契物斯失方類
相襲且或如彼況書之臧否情之愛惡無偏乎若豪釐
較量誰驗準的推其大率可以言詮觀昔賢之評書或
有不當王僧虔云亡從祖中書令筆力過子敬者君子
周而不比乃有黨乎梁武帝云鍾繇書法十有二意世
之書者多師二王元常逸迹曾不睥睨競巧趣精殆同
機神逸少至於學鍾藝巧及其獨運意疎字緩譬猶楚
音夏習不能無楚子敬之不逮真亦劣章草然觀其行

草之會則神勇蓋世況之於父猶擬抗行比之鍾張雖
勅敵仍有擒蓋之勢夫天下之能事悉難就也假如效
蕭子雲書雖則童孺但至效數日見者無不云學蕭書
欲窺鍾公其牆數仞罕得其門者小王則若驚風拔樹
大力移山其欲效之立見僵仆可知而不可得也右軍
則雖學者日勤而體法日遠可謂鑽之彌堅仰之彌高
其諸異乎莫可知也已則優劣斷矣右軍云吾書比之
鍾張鍾當抗衡或謂過之張草猶當雁行又云吾真書

勝鍾草故減張羊欣云羲之便是少推張草庾肩吾云
張功夫第一天然次之鍾天然第一功夫次之王功夫
不及張天然過之天然不及鍾功夫過之懷素以為杜
草蓋無所師鬱鬱靈變為後世楷則此乃天然第一也
有道變杜君草體以至草聖天然所資理在可度池水
盡墨功又至焉太傅雖習曹蔡隸法藝過於師青出於
藍獨探神妙右軍開鑿通津神模天巧故能增損古法
裁成今體進退憲章耀文含質推方履度動必中庸英

氣絕倫妙節孤峙然此諸公皆藉因循至於變化天然何獨許鍾而不言杜亦由杜在張前一百餘年神蹤罕見縱有佳者難乎其議故世之評者言鍾張夫鍾張心悟手從動無虛發不復修飾有若生成二王心手或違因斯精巧發葉敷華多所點綴是知鍾張得之於未萌之先二王見之於已然之後然庾公之評半有焉故韋文休云二王自可未能足之書也或此為累然草隸之間已為三古伯度為上古鍾張為中古羲獻為下古王

僧虔云謝安殊自矜重而輕子敬之書嘗謂子敬書嵇中散詩子敬或作佳書與之謂必珍錄乃題後荅之亦以為恨或云安問子敬君書何如家君荅云固當不同安云外論殊不爾又云人那得知此乃短謝公也羊欣云張字形不及古自然不如小王虞龢云古質而今妍數之常愛妍而薄質人之情鍾張方之二王可謂古矣豈得無妍質之殊父子之間又為今古子敬窮其妍妙固其宜也並以小王居勝達人通論不其然乎羊欣云

右軍古今莫二虞龢云獻之始學父書正體乃不相似
至於筆絕章草殊相擬類筆跡流澤婉轉妍媚乃欲過
之王僧虔云獻之骨勢不及父媚越過之蕭子良云崔
張以來歸美於逸少僕不見前古人之迹計亦無過之
孫過庭云元常專工於隸書伯英猶精於草體彼之二
美而羲獻兼之並有得也夫椎輪為大輅之始以椎輪
之朴不如大輅之華蓋以拙勝工豈以文勝質若謂文
勝質諸子不逮周孔復何疑哉或以法可傳則輪扁不

能授之於子是知一致而百慮異軌而同塗鍾張雖草
創稱能二王乃差池稱妙若以居先則勝鍾張亦有所
師固不可文質先後而求之蓋以一貫之求其合天下
之達道也雖則齊聖躋神妙各有最若真書古雅道合
神明則元常第一若真行妍美粉黛無施則逸少第一
若章草古逸極致高深則伯度第一若章則勁骨天縱
草則變化無方則伯英第一其間備精諸體唯獨右軍
次至大令然子敬可謂武盡美矣未盡善也逸少可謂

韶盡美矣又盡善也然此五賢各能盡心而躋於聖或有侮之亦猶日月之蝕無損於明白雲在天瞻望悠邈固同為終古獨絕百世之模楷高步於人倫之表棲遲於墨妙之門不可以規矩其形律呂其度鵬搏龍躍絕跡霄漢所謂得玄珠於赤水矣其或繼書者雖百世可知然史籀李斯即字書累葉之祖其所製作並神妙至極蓋無等夷八分書則伯喈制勝出世獨立誰敢比肩至如崔及小張韋衛皇索等雖則同品不居其最並不

備載較量然各峻彼雲峰增其海派使後世資瞻仰而
露潤焉趙壹有非草之論仍笑重張芝書為祕寶者嗟
夫道不同不相為謀夫藝之在已如木之加實草之增
葉繪以衆色為章食以五味而美亦猶八卦成列八音
克諧聾瞽之人不知其謂若知其故耳想心識自該通
審其不知則聾瞽者耳庾尚書以臧否相推而列九品
升阮研與衛瓘索靖韋誕皇象鍾會同居第三等此若
棠杜之樹植橘柚之林又抑薄紹之與齊高帝等三十


人同為第七等亦猶屈鹽梅之量處掾屬之伍李大夫以程邈居第一品且書傳所載程初為隸法其於工拙茂爾無聞遺迹又無何以知其品第又云梁氏石書雅勁於韋蔡以梁比蔡豈不懸絕又張昶伯英之弟妙於草隸八分混兄之書故謂之亞聖衛恒兼精體勢時人云得伯英之骨並居第四仍與漢王同流又黜桓玄謝安蕭子雲釋智永陸柬之等與王知敬同居第五等若此數子豈與埒能者好不同又加之以言況可盡之於

剛柔消息貴乎適宜形象無常不可典要固難評也蕭
子雲言欲作二王論草隸法言不盡意遂不能成又云
頃得書意轉深點畫之間所言不得盡其妙者事事皆
然誠哉是言也藝成而下德成而上然書之為用施於
竹帛千載不朽亦猶愈沒沒而無聞哉萬事無情勝寄
在我苟視迹而合趣或漆翰而得人雖身沈而名飛冀
託之以神契每見片善何慶如之懷瓘恨不果游目天
府備觀名蹟徒勤勞乎其所未聞祈求乎其所未見今

錄所聞見麤如前列學慙於博識不迫能繕竒績異多所未盡且如抱絕俗之才孤秀之質不容於世或復何恨故孔子曰博學深謀而不遇者衆矣何獨丘哉然識貴行藏行忌明潔至人晦迹其可盡知開元甲子歲廣陵臥疾始焉草創其觸類生變萬物為象庶乎周易之體也其一字褒貶微言勸戒竊乎春秋之意也其不虛美不隱惡近乎馬遷之書也冀其衆美以成一家之言雖知不知在人然獨善之與兼濟取舍其為孰多童蒙

有求思盈半矣且二王既沒書或在茲語曰能言之者
未必能行能行之者未必能言何必備能而後為評歲
洎丁卯薦筆削焉

法書要錄



御定佩文齋書畫譜卷八

欽定四庫全書

子部
御定書畫譜卷九

詳校官中書臣沈鳳輝

助教臣常循覆勘

覆校官中書臣田尹衡

校對官中書臣張塤

謄錄監生臣陳太初

欽定四庫全書

御定佩文齋書畫譜目錄

第九卷

論書九

書品中

唐張懷瓘書議

唐張懷瓘書估

唐蔡希綜法書論

唐陸羽評徐顏二家書

唐竇泉述書賦

唐竇蒙注述書賦語例字格

欽定四庫全書

御定佩文齋書畫譜卷九

論書九

書品中

唐張懷瓘書議

昔仲尼修書始自堯舜堯舜王天下煥乎有文章文章
發揮書道尚矣夏殷之世能者挺生秦漢之間諸體間
出玄猷冥運妙用天資追虛捕微鬼神不容其潛匿而
通微應變言象不測其存亡竒寶盈乎東山明珠溢乎

南海其道有貴而稱聖其迹有祕而莫傳理不可盡之於詞妙不可窮之於筆非夫通玄達微何可至於此乎乃不朽之盛事故敘而論之夫草木各務生氣不自埋沒況禽獸乎況人倫乎猛獸鷙鳥神采各異書道法此其古文篆籀時罕行用者皆闕而不議議者真正藁草之間或麟鳳一毛龜龍片甲亦無所不錄其有名迹俱顯者一十九人列之於後

崔瑗

張芝

張昶

鍾繇

鍾會

韋誕

皇象

嵇康

衛瓘

衛夫人

索靖

謝安

王導

王敦

王廙

王洽

王珣

王羲之

王獻之

右千百年間得其妙者不越此十數人各能聲飛萬里
榮耀百代雖逸少筆蹟道潤獨擅一家之美天質自然
風神蓋代且其道微而味薄固常人莫之能學其理隱
而意深固天下寡於知音昔爲評者數家既無文詞則
何以立說何爲取象其勢髣髴其形似知其門而未知

其奧是以言論不能辨明夫於其道不通出其言不斷加之詞寡典要理乏研精不述賢哲之殊能況有丘明之新意悠悠之說不足動人夫翰墨及文章至妙者皆有深意以見其志覽之即令了然若與面會則有智昏菽麥混白黑於胃襟若心悟精微圖古今於掌握玄妙之意出於物類之表幽深之理伏於杳冥之間豈常情之所能言世智之所能測非有獨聞之聽獨見之明不可議無聲之音無形之相夫誦聖人之語不如親聞其

言評先賢之書必不能盡其深意有千年明鏡可以照之不疲琉璃屏風可以洞徹無礙今雖錄其品格豈獨稱其才能皆先其天性後其習學縱異形竒體輒以情理一貫終不出於洪荒之外必不離乎工拙之間然智則無涯法固不定且以風神骨氣者居上妍美功用者居下

真書

逸少第一

元常第二

世將第三

子敬第四

士季第五

文舒第六

茂弘第七

行書

逸少第一

子敬第二

元常第三

伯英第四

伯玉第五

季琰第六

敬和第七

茂弘第八

安石第九

章草

子玉第一

伯英第二

幼安第三

伯玉第四

逸少第五

士季第六

子敬第七

休明第八

草書伯英創立規範得物象之形均造化之理然其法

太古質不剖斷以此爲少也有椎輪草意之妙後學得
漁獵其中宜爲第一

草書

伯英第一

叔夜第二

子敬第三

處沖第四

世將第五

仲將第六

士季第七

逸少第八

或問曰此品之中諸子豈能悉過逸少答曰人之材能
各有長短諸子於草各有性識精魄超然神彩射人逸
少則格律非高功夫又少雖員豐妍美乃乏神氣無戈

戟銛銳可畏無物象生動可奇是以劣於諸子得重名者以真行故也舉世莫之能曉悉以爲真草一槩若所見與諸子雷同則何煩有論今製品格以代權衡於物無情不饒不損惟以理伏頗能面質冀合規於玄匠殊不顧於聲俗夫聲俗無眼有耳但聞是逸少必闇然懸伏何必須見見與不見一也雖自謂高鑒旁觀如三歲嬰兒豈敢斟量鼎之輕重哉伯牙子期不易相遇造章甫者當售衣冠之士本不爲於越人也然草與真有異

真則字終意亦終草則行盡勢未盡或煙收霧合或電
激星流以風骨爲體以變化爲用有類雲霞聚散觸遇
成形龍虎威神飛動增勢巖谷相傾於峻險山水各務
於高深囊括萬殊裁成一相或寄以騁縱橫之志或託
以散鬱結之懷雖至貴不能抑其高雖妙算不能量其
力是以無爲而用同自然之功物類其形得造化之理
皆不知其然也可以心契不可以言宣觀之者似入廟
見神如窺谷無底俯猛獸之牙爪逼利劍之鋒鉞肅然

巍然方知草之微妙也且法既不定事貴變通然古法亦局而執子敬才高識遠行草之外更開一門非草非行流便於草開張於行草又處其中間無藉因循寧拘制則挺然秀出務於簡易情馳神縱超逸優游臨事制宜從意適便有若風行雨散潤色開花筆法體勢之中最爲風流者也逸少秉真行之要子敬執行草之權父之靈和子之神俊皆古今之獨絕也世人雖不能甄別但聞二王莫不心醉是知德不可僞立名不可虛成然

荆山之下玉石參差或價賤同於瓦礫或價貴重於連城其八分即二王之石也子敬沒後羊薄嗣之宋齊之間此體彌尚謝靈運尤爲秀傑近者虞世南亦工此法或君長告令公務殷繁可以應機可以赴速或四海尺牘千里相聞迹乃含情言惟敘事披封不覺欣然獨笑雖則不面其若面焉妙用圓通鄰於神化然此論雖不足搜索至真之理亦可謂張皇墨妙之門但能精求自可意得思之不已神將告之理與道通必然靈應有志

小學可不勉與古之名手但能其事不能言其意今僕
雖不能其事而輒言其意諸子亦有所不足或少運動
及險峻或少波勢及縱逸學者宜自損益也異能殊美
莫不備矣然道合者千載比肩若死而有知豈無神交
者也逸少草有女郎材無丈夫氣不足貴也賢人君子
非愚於此而智於彼知與不知用與不用也書道亦爾
或賤於此或貴於彼鑒與不鑒也智能雖定賞遇在時
也嵇叔夜身長七尺六寸美音聲偉容色雖土木形骸

而龍章鳳姿天質自然加以孝友溫恭吾慕其爲人常有其草寫絕交書一紙非常寶惜有人與吾兩紙王右軍書不易近與李造處見全本了然知公平生志氣若與面焉後有達識者覽此論當亦悉心矣夫知人者智自知者明論人才能先文而後墨義獻等十九人皆兼文墨乾元元年四月日張懷瓘述

唐張懷瓘書估

有好事公子頻紆雅顧問及自古名書頗爲定其差等

曰可謂知書矣夫丹素異好愛惡罕同若鑒不圓通則各守封軌是以世議紛糅何不製其品格豁彼疑心哉且公子貴斯道也感之乃爲其估貴賤既辨優劣了然因取世人易解遂以王羲之爲標準如大王草書真字一百五字乃敵一行行書三行行書敵一行真正偏帖則爾至如樂毅黃庭太史箴畫贊累表告誓等但得成篇即爲國寶不可計以字數或千或萬惟鑒別之精麤也他皆倣此近日有鍾尚書紹京亦爲好事不惜大費

破產求書計用數百萬貫錢惟市得右軍行書五紙不能致真書一字崔張之迹固乃寂寥矣惟天府之內僅有存焉如小王書所貴合作者若藁行之間有興合者則逸氣蓋世千古獨立家尊纔可爲其弟子爾子敬神韻獨超天姿特秀流便簡易志在驚竒峻險高深起自此子然時有敗累不顧疵瑕故減於右軍行書之價可謂子爲神駿父得靈和父子真行固爲百代之楷法然文質相沿立其三估貴賤殊品置其五等三估者篆籀

爲上估鍾張爲中估義獻爲下估上估但有其象蓋無其蹟中估乃曠世奇蹟可貴可重有購求者宜懸之千金或時不尚書薰猶同器假如委衢路猶可字償千金其杜度崔瑗可與伯英價等然志乃尤古力亦微大惟妍媚不逮於張芝衛瓘可與張爲弟索靖則雄逸過之且如右軍真書妙極又人間切須是以價齊中估古遠世稀非無降差崔張玉也逸少金也大賈則貴其玉小商乃重其金膚淺之人多任其耳但以王書爲最真草

一槩略無差殊豈悟右軍之書自有五等

黃帝史 周宣史 鍾繇 張芝 王羲之

崔瑗 衛瓘 索靖 王獻之

已上九人第一等

蔡邕 張昶 荀勗 皇象 韋誕

鍾會等度德比義並崔張之亞也可微劣右軍行書之價

已上六人第二等

曹喜

邯鄲淳

羅暉

趙襲

崔寔

劉德昇

師宜官

梁鵠

胡昭

荀爽

張彭祖

張弘

傅玄

魏武帝

曹植

吳孫皓

孫權

應璩

徐幹

張昭

嵇康

何曾

衛覲

杜預

楊肇

樂廣

劉恢

司馬攸

衛恒

衛夫人

衛玠

李式

王敦

郝鑒

郝愔

韋昶

桓玄

王廙

王導

王洽

王珉

謝安

庾廙等或奇才見拔或絕世難

求並庶幾右軍草書之價

已上四十三人第三等

張嘉

庾亮

郝超

王珣

戴若思

衛瓘

僧惠式

王修

張翼

戴安道

王玄之

王凝之

王徽之

王操之

孫興公

王允之

宋文帝

宋武帝

康昕

王僧虔

謝靈運

羊欣

薄紹之

孔琳之

蕭思話

張永 蕭子良 齊高帝 蕭子雲等互有得失
時見高深絕長續短智均力敵可敵右軍草書三分
之一

已上二十九人第四等

張越

張融

陶弘景

阮研

毛喜

僧智永

虞世南

歐陽詢

褚遂良等可敵右軍

草書四分之一

已上九人第五等

已上率皆估其甚合者其不會意數倍相懸大凡雖則同科物稀則貴今妍古雅漸次陵夷自漢及今降殺百等貴遠賤近淳漓之謂也凡九十六人列之如右五等之外蓋多賢哲聲聞雖美功業未邁空有望於屠龍竟難成於畫虎不入流品深慮遺材天寶十三載正月十八日

法書要錄

唐蔡希綜法書論

余家歷世皆傳儒素尤尚書法十九代祖東漢左中郎

邕有篆籀八體之妙六世祖陳侍中景歷五世伯祖隋
蜀王府記室君知咸能楷隸俱爲時所重從叔父右衛
率府兵曹參軍有隣繼於八體之蹟第四兄緱氏主簿
希逸第七兄洛陽尉希寂並深工草隸頗爲當代所稱
也周宣王史籀作大篆秦始皇程邈改爲隸書東漢上
谷王次仲以隸書改爲楷法仲又以楷法變爲八分其
後繼蹟者伯喈得之極元常或其亞草聖始自楚屈原
章草興於漢章帝楷隸則曹喜師宜官梁鵠皇象羅景

趙嗣邯鄲淳胡昭杜度窮草法則崔瑗崔寔張芝張昶
索靖衛瓘衛恒羲獻宗齊之間王僧虔羊欣李鎮東蕭
子雲蕭思話陶隱居永禪師唐初房喬杜如晦楊師道
裴行儉高士廉歐陽詢虞世南陸柬之褚遂良薛稷其
次有瑯琊王紹宗潁川鍾紹京范陽張庭珪亦深有意
焉父兄子弟相繼其能者東漢崔瑗及寔弘農張芝與
弟昶河東衛瓘及子恒潁川鍾繇及子會瑯琊王羲之
及子獻之西河宋金文及子之遜東海徐嶠之及子浩

蘭陵蕭誠及弟諒如是數公等並遭盛明之世得從容
於筆研始其學也則師資一同及爾成功乃菁華各擅
亦猶綠葉紅花長松翠柏雖占雨露孕育於陰陽而盤
錯森梢茸艷逸各入門自媚詎聞相下咸自我而作
古或因奇而立度若盛傳於代以爲貽家之寶則八體
之極是歸乎鍾蔡草隸之雄是歸乎張王此四賢者自
數百載來未之逮也

書苑菁華

唐陸羽評徐顏二家書

徐吏部不授右軍筆法而體裁似右軍顏太保授右軍筆法而點畫不似何也有博識君子曰蓋以徐得右軍皮膚眼鼻也所以似之顏得右軍筋骨心肺也所以不似王氏法書苑

唐竇泉述書賦

論周至唐一十三代工書史摘等二百七人署證徐僧權等八

人印記太平公主等十一家述作梁武帝等十家徵求竇玩鼻述等二十六人利通貨易穆丰等八人

古者造書契代結繩初假達情浸流競美自時厥後迭

代沿革朴散務繁源流遂廣漸備楷法區別妍媸洎乎
我唐天寶末國有寇難府庫傾覆散墜閭閻而興復京
都所司徵購得其歸者蓋寡矣余至德中往往偶見祛
積年之遐想駭此生之新觀雖欣鄙夫之幸遇實爲吾
君之痛惜恨沉草莽上達無階因記彼而銜求願沾諸
而善價然爲監臨動靜公私貿遷徒暫披翫終歸他室
今記前後所親見者并今朝自武德以來迄於乾元之
始翰墨之妙可入品流者咸備書之

周一人史稿卷一
人李斯漢二人蔡

邕杜操魏五人章誕虞松司馬師司馬昭鍾會吳二人
皇象賀劭晉六十三人齊獻王元帝成帝康帝孝武帝
武陵王會稽王楊肇山濤嵇康張翰蔡克顧榮劉琨孔
佩孔瑜陶侃熊遠應詹卞壺劉超謝藻庾亮庾惔庾翼
庾準郗鑒郗愔郗曇郗超郗儉之郗恢謝尚謝奕謝安
王導王劭王珣王羲之王獻之王廙王濛王述丁潭何
充劉訥劉琨張澄劉璞張翼桓溫桓玄江灌沈嘉劉琨
之劉廙范汪范甯諸葛長民劉穆之溫叔之楊羲宋瑛
宋二十五人武帝文帝孝武帝明帝南平王海陵王謝
靈運謝方明張茂度張永羊欣孔琳之薄紹之王敬弘
王思立顏峻桓護之駱簡蕭思話龐秀之巢尚之裴松
之徐爰江僧安賀道力齊十五人齊高帝武帝竟陵王
褚淵褚賁徐孝嗣王僧虔王慈王志王儉劉攜顧寶光
胡諧之徐希秀張融梁二十一人武帝簡文帝劭陵王
孝元帝蕭確蕭子雲王克陸杲任昉傅昭朱异王籍殷
鈞阮研王褒蕭特庾肩吾陶弘景江革周弘讓范懷約

欽定四庫全書

和定書畫譜
卷九

十四

陳二十一人武帝文帝煬帝沈后新蔡王廬陵王永陽
王桂陽王釋智永智果江總徐陵沈君理袁憲毛喜蔡
景歷蔡徵顧野王伏知道謝嘏賀朗趙文深趙孝逸唐
四十五人神堯皇帝文武聖皇帝則天武后睿宗開元
皇帝漢王元昌岐王元範李懷琳歐陽詢歐陽通虞世
南虞纂虞煥褚遂良陸柬之薛稷房玄齡殷仲容王知
敬王紹宗孫過庭張旭賀知章徐嶠之徐浩李道韓擇
木田琦衛包蔡有隣鄭遷李權李樞李平均王維王縉
史維則李陽冰家舅繪姨兄明若山宋儋李璆蕭誠張
從中呂向家兄蒙馬氏妻劉恭妹等應親見者所言

並錯綜優劣直道公論或理盡名言即外假興喻雖闕
標舊品而畢寄斯文刊訛誤於形聲定目存於指掌其
所不覩空居名額并世所傳搨者不敢憑準一皆略焉

其詞曰

嘗考古而閱史病賤目而貴耳述勲庸而任人揮翰墨
而由已則知親矚延想如見君子諒風雅之足憑奚卷
舒之能已古猶今也斯得美矣雖六藝之末曰書而四
人之首曰士書資士以爲用士假書而有始豈特長光
價於一朝適容貌於千里

王羲之書戰山木竹角扇五
字字索百錢人競買去梁元

帝書亦云千里之
面目轉覺爲能矣

篆則周史籀秦李斯漢有蔡邕當代

稱之俱遺芳刻石永播清規籀之狀也若生動而神憑

通自然而無涯遠則虹紳結絡邇則瓊樹離披斯之法也
馳妙思而變古立後學之宗祖如殘雪滴溜映朱檻而
垂冰蔓木含芳貫綠林以繩直伯喈三體八分二篆
磔戟鸞弧星流電轉纖逾植髮峻極層巘周秦漢之三

賢余目驗之所先石雖貞而云泐紙可寄而寶傳

史籀周宣

王時史官著大篆教學童岐州雍城南有周宣王獵碣十枚並作鼓形上有篆文今見打本史部侍郎蘇勗敘記卷首云世咸言筆蹟存者李斯最古不知史籀之迹近在闕中即其文也李斯上蔡人終秦丞相作小篆書
嶧山碑後具名銜碑既毀失土人刻木代之與斯石上本差稀又至德中安史敗後四從弟洺於河陽清水渠

下得傳國璽其文曰受命於天既壽永昌點畫皆隱起作龍鳥狀側丈小篆曰魏所受漢傳國璽背上蟠螭一角折鼻尖有黃疵瑕按驗譜牒乃無差舛云斯所書蔡邕字伯喈陳留人終後漢左中郎將今見打本三體石經四紙石既尋毀其本最稀惟草分章體肇起伯度時稜萬及光和等碑時時可見

君重而立名自我行而作故掣波循利創質畜怒

杜操字伯

度京兆人終後漢齊相章帝貴其蹟詔上章表故號章草魏之仲將奮藻獨步或迸

泉湧溢或錯玉班布蹟遺情忘契入神悟然而負才藝

履危懼膏明自煎鬢髮改素生非其代痛惜不遇名微

格高復見叔茂體裁簡約肌骨豐嫵如空凝斷雲水泛

連鷺

韋誕字仲將京兆人終魏光祿大夫時凌雲臺成先誤釘胸明帝使誕坐籠以鹿盧引上就書去地

二十五文及下鬢髮皓然虞松字叔茂會稽人終魏中書令大司農挹子元之環蹟高子

上之雄神量蘊文儒才苞古人或寄詞達禮任道懷仁

或仰則鍾繇平視衛臻如晴郊駟馬維嶽降神

司馬師字子元

河內人終魏錄尚書事大司馬忠武公及失受禪追尊曰景皇帝弟昭字子上終魏相國錄尚書事封文王追

尊文皇帝觀士季之軌轍審鍾家之超越將望古而偕能與

象賢而蹈拙如後生之可畏寔氣蓋乎前哲

鍾會字士季潁川人

錄子終魏征西將軍

吳則廣陵休明朴質古情難以窮真非可學

成似龍蟠蟄啓伸盤復行

皇象字休明廣陵人終侍郎吳青州刺史

賀氏興

伯同時共體瘠而不踈逸而寡禮等殊皇賀品類兄弟

賀劭字興伯吳興人終吳太子太傅

司馬氏之受禪炎爲帝祖偉哉齊王

手蹟目覩翰墨之外仁賢是優重則突兀嵩華輕則參

差斗牛

司馬攸字大猷文帝第二子武帝弟封齊獻王官至侍中大司馬

逮乎龍化東

遷景文興嗣天然俊傑豪翰英異元帝之用筆可觀世

瑜之呈規仰似如發硎刃虎駭鶚貽懦夫喪精劒客得

志

元帝諱睿字景文東朝中興之主當東遷諺曰五馬浮渡江一馬化爲龍即其人也

成帝則生

知草意穎悟通諳光使畏魄青疑過藍勁力外夾古風

內含若雲開而乍覩旭日泉落而懸歸碧潭

成帝諱衍字世根元

帝孫明帝子

康帝則幼少閑慢迥出凡境駟馬安車不尚馳

騁

康帝諱岳字世同成帝弟

真率孝武不規不矩氣有餘高體無所

主若露滋蔓草風送驟雨

孝武帝諱曜字昌明簡文帝子

赳赳道叔遠

淳邇俗舉姓名而孰多議風度而不足元子憚其武威

吾徒遵其軌躅

武陵王晞字道叔明帝弟

道子雅薄絛密纖潤露輕

藏沉假曲躡峻猶尺水之含衆象小山之擬萬仞

會稽王道

子孝武
帝子

季初則隱姓名展纖勁寫搨共傳賞能交盛猶

鋸牙鉤爪超越陷穽

楊肇字季初榮陽人晉荊州刺史

巨源正書朴略

仍餘染翰忘筌寄情得魚若披堅草澤匿銳茅廬

山濤字巨

源河內人晉侍中司徒

叔夜才高心在幽墳允文允武令望令聞

精光照人氣格凌雲力舉巨石芳逾衆芬

嵇康字叔夜燕國人晉中

散大夫

季鷹有聲古貌磅礴雖無名驗攀附張索如凝陰

斷雲垂翅一鷗

張翰字季鷹吳郡人晉大司馬掾

子尼簡約片月孤峰

千歲之下森森古容

蔡克字子尼陳留人晉成都王掾子謨過江食蟹遇毒者本朝尚書

僕射

彦先尚質無而不有猶崆峒之上世俗誰偶

顧榮字彦先吳

郡人

晉驃騎將軍

越石偉度粃糠翰墨如伐樹而愛人似問鼎

而在德

劉琨字越石中山人晉太尉

敬思敬康二孔殊芳思行則輕

利峭峻類驚蚪逸駿康草則古質鬱紆如落翮摧枯

孔偶

字敬思會稽人晉大司農孔瑜字敬康會稽人車騎將軍

雍容士行季孟公旅肌骨

閑媚精神慢舉如辭山登朝混迹雜處

陶侃字士行秣陵人晉侍中大

將軍

孝文剛斷謹正援豪古體雖拙今稱且高如貴胄之

躍駿武賁之操刀

熊遠字孝文豫章人晉大將軍長史

思遠則藁草懸解

筆墨無在真率天然忘情罕逮猶羣雀之飛廣廈小魚

之戲大海

應詹字思遠汝南人晉鎮南大將軍

望之之草繁古而老落紙

筋槃分行羽抱如充仞多士交連雜寶

卞壺字望之濟陰人晉侍中驃

騎大將軍

體大法殊實推世踰稟天然而自強亂帝礼而見

拘猶朝廷宿舊年德相趨

劉超字世踰瑯琊人晉衛尉零陵忠侯超手筆與元帝相

類自職居近密遂絕其與外所交書

叔文法鍾纖薄精練用筆雖巧結字

未善似漸陸之遵鴻等窺巢之乳燕

謝藻字叔文會稽人晉中書侍郎

博哉四庾茂矣六郗三謝之盛八王之奇至如強骨慢

轉逸足難追翰斷蓬征拖蔓葛垂任縱盤薄是稱元規

庾亮字元規潁川人晉太尉

遺古效鍾叔豫高蹤雖穩密而傷浮淺

猶葉公之愛畫龍

庾惲字叔豫潁川人晉衛將軍

積薪之美更覽稚恭

名齊逸少墨妙所宗善草則鷹搏隼擊工正則劒鐔刀

鋒愧時譽之未盡覺知音而罕逢其荒蕪快利彥祖爲

容似較狡兔於大野任平陂之所從

庾翼字稚恭晉車騎將軍與翼並

是亮從弟庾準字彥祖希子亮孫晉豫州刺史

道徽之豐茂宏麗下筆而剛決

不滯揮翰而厚實深沉等漁父之乘流鼓枻高平奕葉

盛德遺能方回重熙接翼嗣興四則章健草逸發體廉
稜若冰釋泉涌雲奔龍騰密壯奇姿撫蹟重熙若投石
拔距怒目揚眉景興當年曷云世乏正草輕利脫略古
法蹟因心而謂何爲吏士之所多惜森然之後爽嗟蔑
爾於中和處約道脗家之後俊狂草勢而兄優謹正書
而弟潤俱始登於學次慙一虧而九仞

郝瑩字道徽高平人也晉太宰

郝愔字方回瑩字重熙並瑩子愔晉司空瑩晉中郎將

超字景興愔子晉臨海太守儉之字處約晉太子率更

令愔字道脗晉鎮軍將軍處約道脗並是瑩子

謝氏三昆尚草特峻猶注飛澗

之瀑溜投全牛之虛刃達士逸蹟乃推無奕豪翰云爲
任興所適能事雅量末歸安石至夫蘊虛靜善卓正方
員自窮禮法拘性猶恒德之仁智應物之龜鏡恨其心
懼景興書輕子敬塞盟津而捧土損智力有餘病

謝尚字仁

祖陳郡人晉散騎常侍謝奕字無奕晉鎮西將軍謝安字安石尚弟晉侍中太傅安得獻之書時斷作紙夾馬

業盛瑯琊茂弘厥初衆能之一乃草其書將以潤色前
範遺芳後車風稜載蓄高致有餘類賈勇之武士等相
驚之戲魚有子敬倫蹟存目驗以古窺今調涉浮豔尚

期羽翼鴻漸芝蘭香染與兄勝而弟負將奢也而寧儉

繩繩宜爾傑出季琰露鋒芒而豁懷傍禮樂而無檢猶

搏扶搖而坐致超峻極而非險

王導字茂弘瑯琊人晉丞相謚曰文獻公王劭

字敬倫即導子晉車騎將軍兄即恬洽洽子琰字季琰晉中書令

然則窮極奧旨逸少

之始虎變而百獸踰風加而衆草靡肯縈游刃神明合

理雖興酣蘭亭墨仰池水武未盡善韶乃盡美猶以爲

登泰山之崇高知羣阜之迤邐逮乎作程昭著褒貶無

方穠不短纖不長信古今之獨立豈末學而能揚幼子

子敬創草破正雍容文經踴躍武定態遺妍而多狀勢
由已而靡罄天假神憑造化莫竟象賢猶乏乎百中偏
悟何慙乎一聖斯二公者能知方祁氏之奚午天性近
周家之文武誠一字而萬殊且含規而孕矩然而真蹟
之稱獨標侯侯忘本世心余所不取何哉且得於書法

失於背古是知難與之渾樸言可以爲斲磨主矣

王羲之字

逸少晉右軍將軍幼子
獻之字子敬晉中書令

溫溫伯輿亦扇其風風流之表

軒冕之中骨體道正精彩沖融已高天然恨乏其功如

承奕葉之貴胄備夙訓之神童

王廐字伯興即導孫
舊子晉司徒左長史粵

若太原之英二子間生仲祖慕元常之則懷祖通文獻

之情方言慕而我媿

吉慕鍾繇

比叔文而此榮

比叔文即謝藻

習所

通而不及

言通王導

參放之而先鳴

參溫放之

結束體正肆力專

成猶棟梁富於合抱巧匠斲而未精

即王濛也

高利迅薄連

屬鼓傾猶鳥避羅而勢側泉激石而分橫

即王述也王濛字仲祖太

原人晉金紫光祿大夫王述字懷祖太原人晉尚書令藍田侯

若夫反古不忘吾推世

康似無逸少如稟元常猶落太階之棠焚掇祕府之芸

芳

丁潭字世康會稽人國孫彌子晉散騎常侍

次道淳實寡於風彩自是雄

姿翰墨具在如士大夫之京華遊處參貴胄而膚質未

改

何充字次道廬江人庾亮舅晉侍中司空

行仁靡雜唯鍾是師悅端閑於

高軌能終始於清規雖帶偏薄亦能鄰幾若鳳雛始備

於五采長松僅舉乎一枝

劉訥字行仁瑯琊人晉散騎常侍

真長則草

含稚恭之爽塏正邇越石之羈束輕浮森峭穠媚藻縟

落衆木於秋杪狎羣鷗於水曲

劉琨字真長沛郡人晉丹陽尹

國明勵

躬鍾氏餘風壯利纖薄守雌知雄如道門之子仙路時

通

張澄字國明吳郡人嘉之子晉光祿大夫

猗歟子成狗蹟過名正隸敦實

藁草沉輕元常高風雖踈復呈猶不考擊之鍾鼓含律

呂之音聲

劉璞字子成南陽人晉光祿勳即得道南岳魏夫人子夫人魏舒女父義晉河內修武令

君祖馳馭藝忝令譽窮正驗草而罕逮其能作偽亂真

而未可爲據正企鍾而悠邈草師王而莫著與夫敬仁

道羣

王修江灌

或拔茅以連茹猶銳意鵬舉致身鷹翥

張翼字君

祖下邳人晉東海太守時穆帝令翼寫王右軍手表帝自批後右軍殆不能別久乃悟云小人幾欲亂真

元

子正草厚而不倫若遺翰墨猶帶真淳似山林之樂道

非玉帛之能親

桓溫字元子熱國人彞子晉丞相大司馬南郡宣武公

敬道耽翫

銳思豪翰依憑右軍志在凌亂草狂逸而有度正踈澀

而猶憚如浴鳥之畏人等驚波之汎岸

桓玄字敬道溫子歷晉義興太

守自署丞相僭號曰楚

道羣閑慢氣格自充始習新制全移古風

與伯輿之合極

王

若子敬之童蒙猶富禮樂之世胄備

神彩於厥躬

江灌字道羣陳留人晉侍中中護軍

長茂草勢既捷而踈慕

王不及獨斷所如猶鷙鳥擊搏而失中因踳躓於丘墟

沈嘉字長茂吳郡人晉吳興太守

元寶剛直兩王之次骨正力全軌範

宏麗凌突子敬病於輕肆同變武而習文若訪龍而獲

驥

劉瓌之字元寶沛國人
晉御史中丞義城伯

季舒纖勁循古有體遇稀難

評唯署一啓

劉廐字季舒會稽
人晉光祿大夫

順陽筆精吾見玄平近

瞻元常俯視國明

張澄

利且掩薄多能似生如班輸之運

斧乏棟以經營

范汪字玄平順陽
人晉安北將軍

武子正筆頗全古質

去凡忘情任樸不失猶高人之與釋子志繇道而秉律

范甯字武子汪
子晉中書侍郎

長民則全效子敬便與性分宏逸生於

天機衆妙總而獨運凌所師而小薄壯若已而不素猶

豁其流而氷開殷其響而雷奮

諸葛長民瑯琊人晉輔國將軍宣城內史

道

和閑雅離古躡真慢正繇德高蹤絕塵若昂藏博達之

士謇諤朝廷之臣

劉穆之字道和東莞人晉侍中司徒

放之率爾草健筆

力豈忘保持足見準則猶片錦呈巧細流不極

溫放之太原人

嶠子晉黃門侍郎

楊真人之正行兼淳熟而相成方員自我結

構遺名如舟楫之不繫混寵辱以若驚

真人諱義弘農人

宋珽

訛緊足光利用習古者或以爲輕日新者必因而重猶

樸散而分形器務成而立賦頌

宋珽廣平人晉相府參軍

宋武德與

法含古初見答道和之啓未披有位之書觀其逸臺巨

麗載兆虎變高躅莫究其涯雄風於焉已扇猶金玉鑛

璞包露貴賤

劉裕字德興彭城人昶子晉太尉中書監封宋公後受禪稱宋武帝

皇矣文

帝大知正隸舉已達於縱橫攀王媚於緊細

獻

向精專

而習熟幾可與之興替尚瞻擊水之鵬搏且並聞天之

鶴唳

文帝諱義隆武帝第三子

孝武則武威戡難翰墨馳聲雖稟訓

而已高恨一簣而未成徒忌人之賢已冀及父之令名

王僧虔書用掘筆以自容

與思話而雄強追彥琳而愧恥

蕭思話孔琳之

若

夷狄之佳麗慕容顏於桃李

孝武帝諱駿字休龍文帝第三子

太宗徽

音用壯之心遺棄鄙野不無高深快埽時俗匠古鄰今

冠祖黎之下果怯鸞鳳之珍禽

明帝諱彧字休炳孝武帝弟

南平休

玄筆力自全幼齒結構老成天然比夫鳥在殼龍潛泉

符彩卓爾文詞粲然

南平王鐔字休玄文帝第四子

休茂尚沖已工法

則長於用筆結字短於精神骨力性靈可觀運用未極

猶鳬雛鵠子初備羽翼

海陵王休茂文帝第十四子

後見三謝兩張

連輝並俊若夫小王風範骨秀靈運快利不拘威儀或

擯猶飛湍激石電注雷迅

謝靈運陳郡人
宋侍中祕書監

方明寬和隱

媚且潤如幽閑女德禮教士脩

謝方明陳郡人惠
連父宋會稽太守

茂度

逸翰景初清規或大言而峻薄

景初對文帝云臣恨
二王不得臣之體

或

寡譽而掘竒

王僧虔用掘
筆以自容

並心輕兩王蹟及宗師擬鶴

鳴而子和殊鯉退而學詩

張茂度吳郡人敞子宋會稽
太守張永字景初茂度子宋

征西將軍

敬元則親得法於子敬雖時移而間出手稽無方

心敏奧術寧礪礪而不忘本分縱橫而龐得師骨遇其

合時髣髴唐突猶圖駢驥而莫展倬真仙而非實爾後

王羊謬同衆靡餘風彥琳敬叔允執厥中孔則愈於緊
速病於枯偏超舉之餘窺羊及肩猶蓬瀛心想護武風
傳競其豐利又覩薄氏織員克成骨力猶稚精彩潤密
乃誠莫貳駕友凌師抑亦其次雖鎗無金價而珉實玉

類

羊欣字敬元泰山人不疑子宋中散大夫與立道護同授獻之筆法所言王羊謬同諺云買王得羊不失

所望吉虛也孔琳之字彥琳會稽人宋太常卿薄紹之字敬叔丹陽人宋給事中與楊孔並師小王

淮水

茂族敬弘不墜故朝餘風翰墨兼至既約古而任逸亦

遺能而獨駛猶荆挺植於昔人全朴略而成器

王敬弘
瑯琊人

導孫宋侍中
左光祿大夫

蔓衍枝派思玄不忘穩厚而無法度淳和

而蓄鋒芒猶君子自適順時行藏

王思玄瑯琊人
宋南康太守

顏氏

儒門士遜墨妙大令典則中散風調薄首孔肩體格惟

肖如驚弦履險避地膺峭

顏竣字士遜瑯琊人延之子
宋右將軍東揚州刺史史吉薄

苜孔肩則獻之
羊欣紹之琳之

垣公護之神凝筆遲富雅景乏士規猶

門寒道高衣薜言詩

垣護之字彥宗洛陽人宋寧朔將軍

翩翩正祖恭已

法則師資小王深入閭域安知逸氣未詳筆力猶驥異

真龍紫非正色

駱簡字正祖丹陽人宋鉅野令

思話緜密緩步娉婷任

性工隸師羊過青似鳬鷗鷺遊戲沙汀

蕭思話蘭陵人宋征西將

軍丹陽尹

二王變古法有所屬兢兢秀之斂翰謹束如仙童

樂靜不見可欲

龐秀之宋江州刺史

仲遠循常繇衷邇俗企彥琳

之牆仞遵茂度之軌躅

張茂度

豈聞一而得三同出吳而

入蜀

巢尚之字仲遠魯國人宋寧朔將軍

世期旁通崛強斷利叅方回之

章法

郝愔

得敬元之草意

羊欣

匪庖丁之解牛同君子之不

器

裴松之字世期河東人宋散騎常侍大中大夫

長玉靡慢神閑態穠護小王

之偉質錯明帝之高蹤猶執德而風塵不雜發言而禮

義攸從

徐爰字長玉瑯琊人本名璩避傳亮諱除玉宋大中大夫

江侯僧安捷利而

乾貌兼輕媚體出多端猶閒庭之卉木小苑之峰巒

江僧

安陳留人宋太子中庶子

道力草雄員轉不窮壯自躬之體格疲逸

少之遺風猶立言而逍遙出世驗迹乃夙夜在公

賀道力會

稽人宋吳興全

齊高則文武英威時來運歸挺生紹伯墨妙翰

飛觀乎吐納僧虔擠排子敬昂藏鬱拔勝草負正猶力

稽牛刀水展龍性

蕭道成字紹伯蘭陵人永之子宋右僕射太尉封十郡為王及受禪即位

稱齊高帝

世祖宣遠象賢豈敢仰英規而無功超筆力而有

膽莫顧陳式率由胷襟能騁逸氣未忘童心若橫波束

薪泛濫淺深

武帝諱頤字宣
遠高帝長子

子良則能知未善心遠蹟

邇家風若遺古則翻鄙雖有力而無體將從真而自美

猶土階茅茨儉德之始

竟陵王諱子良武帝子

彥回無節筆翰亦

爾快利不拘足用而已如垂枝楓柳抑葉杞梓

褚淵字彥

回河南人宋末與高帝同掌樞密後
齊鑒建以佐命功受司徒中書監

蔚先忠良自我名

揚老成不虧和雅允臧若窮隱肥遁志傲侯王

褚賁字蔚先洲

之子齊祕書監以父憂免職便不仕時
人以爲恥父失節於宋室遂爾屏居

非禮不言從容

始昌如碩德君子道義難量而盛德有素筆精源長

徐孝

嗣字始昌東海人齊太尉尚書令

簡穆父子載茂餘芳僧虔則密緻豐

富得能失剛鼓怒駿爽阻員任強然而神高氣全耿介鋒芒發卷伸紙滿目輝光才行兼而雙絕名實副而特彰如運籌決勝威震殊方伯寶次道並資義訓兄則雜

太祖高帝

而外兼稟家君於已分第則纖薄無滯過庭益俊

並能寬閒墨妙逸速豪奮比達士與君子人不知而不

愠仲寶同夫季舒署名莫窺牆仞

王僧虔瑯琊人景首子齊尚書令簡穆公

欽定四庫全書

卷九

王慈字伯寶王志字次道並僧虔子慈齊侍中冠軍弟志齊侍中吏部尚書王儉字仲寶僧綽子齊尚書全

茂謙則壯而不密騁志恒俗輕師謨任縱欲如勇夫格

獸徑越林麓

劉協字茂謙彭城人齊太子洗馬御史中丞

寶光諧之同調合

韻差池去就羽翮齊振依蕭附王

道成僧虔

俱曰慕蘭論骨

氣而何壯驗精神而顧峻猶岸柳之先春得地連於河

潤

顧寶光吳郡人齊司徒左西掾胡諧之南昌人齊度支尚書

希秀之蹟敬叔之倫

薄紹之

正則謹促有度草則拘檢靡伸如儉德君子清朝

士人

徐希秀瑯琊人齊驍騎將軍

思光逸才揮翰無滯超寶光之力

從僧虔之制越恒規而涉往出衆格而靡繼如塞路蓬

轉摩霄爲唳

張融字思光吳郡人齊司徒左長史

梁則高祖叔達恢弘厥

躬泯規矩合童蒙文勝質而辭寡明察衆而理窮猶巧

匠琢玉心愜雕蟲

蕭衍字叔達蘭陵人順之子齊左僕射征東將軍封梁王及受禪即位稱

梁武帝

簡文慕鍾不瑕有害傲景喬而含古

蕭子雲

肩邵陵

而去泰

簡文帝諱綱字世續武帝第三子

世調則氣吞元常若置度內

方之惠達

蕭特

旨趣猶昧擅時譽而徒高考遺蹤而罕逮

邵陵王綸字世調武帝第六子

孝元不拘快利睢盱習寬舒於一體加

緊薄而小殊惟數君之翰墨稱天倫之友于皆可比蘭

菊殊芳鴻鴈異軀

孝元帝諱繹字世誠武帝第七子

仲正則寬而壯賒

而密婆婆蹣跚綽約文質稟庭訓而微過任天然而自

逸若衆山之連峰探仙洞而不一

蕭確字仲正綸子梁廣州刺史永安侯

景喬則潤色鍾門性情勵已豐媚輕巧纖慢旖旎詩雖

易其國風賜豈賢於夫子猶鸞窺鏡而鼓翼虎不啗而

履尾

蕭子雲字景喬蘭陵人梁侍中國子祭酒

名劣筆健乃逢王克通流未

精疎快不忒猶腐儒宿士運用自得

王克瑯琊人梁尚書僕射

陸杲

迅熟騁捷遺能任縱便無風稜如郊垌羽獵賊狻奔騰

陸杲吳郡人梁光祿大夫揚州大中大夫

體雜閑利觀夫彥昇構牽掣而無

法任胃懷而足憑猶注懸泉咽凝冰

任昉字彥昇樂安人梁吏部侍郎掌

著茂遠健銳足以自給彥和連環迅不可及如過雨之

奔簷雷飛燎之赫原隰

傅昭字茂遠北地人梁祕書監金紫光祿大夫貞子也朱昇字

彥和吳郡人中領軍右僕射

文海緊快勢逸氣高未忘俗格銳意操

刀猶樂成名於朝市嗤遁迹於蓬蒿

王籍字文海瑯琊人僧虔子梁左塘

令季和慢速風規所屬員轉頗通骨氣未足

殷鈞字季和陳郡人

梁國子祭酒

文機纖潤穩正利草輒媚橫流姿容美好若其

抑阮褒殷庶幾同塵似泉激溜於懸磴木垂條於晚春

阮研字文機陳留人梁交州刺史

惟子深與惠達總景喬之幼志俱親

拂豪同陪結字深正穩而寡力達草寬而豐意或比父

而疎省或過師而巧媚誰與別其羅紈且欲同乎簾笥

王褒字子深瑯琊人規子梁尚書僕射蕭特字惠達子雲子梁海鹽令

肩吾通塞并乏天

性工歸文華拙見草正徒聞師阮

阮研何至遼夏使鉛刀

之均鋒稱並利而則佞

庾肩吾字子慎新野人梁度支尚書

通明高爽緊

密自然擺闔宋文峻削阮研載窺逸軌不讓真仙猶龍

髯鶴頸奮舉雲天

陶弘景字通明丹陽人隱居山林武帝追謚貞白先生

彥淵氣

懦任力或滯猶翮短風高昇沉靡制

江舊字彥淵濟陽人梁吏部侍郎

弘讓迅快放誕可觀利疾速著筆墨輕乾若星居僻陋

蔓木膠盤

周弘讓汝南人弘正弟

蠢蠢懷約任已作制若孤陋儒

生辛勤一藝

范懷約吳郡人梁東宮侍書

爰及陳氏霸先勦業盤桓

有威牢落無法王師憑怒挫衄攻劫嗟文煬而不知徒

染豪而敗法

陳霸先潁川人文璿子歷梁司空丞相封爲陳公後受禪即位稱陳武帝文帝諱蒨

字子華武帝子煬帝諱叔寶字元秀宣帝子

沈氏后德名標嫔華允光親署

獨美可嘉如晚晴游雲傍日殘霞

煬帝后沈氏吳興人君理之女嫔華后字

叔齊鬱然名押而已伯仁軟慢尺牘近鄙欽榮之之勁

舉雖師心而入流高踈壯浪復覩伯謀並如策馬馳逐

葦航泛浮

新蔡王叔齊字子肅煬帝弟官至侍中國子祭酒廬陵王伯仁字壽之煬帝子官至光祿

大夫中武將軍永陽王伯智字榮之廬陵王弟官至左翊將軍桂陽王伯謀字深之永陽王弟官至丹陽尹

智永智果禪林筆精天機淺而恐泥志業高而克成或拘凝重蕭索家聲或利凡通周章擅名猶能作緇門之

領袖爲當代之準繩並如君子勵躬於有道高人保志

而居貞

會稽永興寺僧智永俗姓王氏右軍孫僧智果會稽人

坡陀總持獨步方

外甘率性而衆異非接武於興會若時違隱淪卒不冠

帶

江總字總持濟陽人陳尚書令

孝穆鄙重剛毅任拙猶偏裨武夫膽

勇志怯

徐陵字孝穆東海人陳左僕射

仲倫則快速無度馳突不踈尺

題已終筆勢仍餘似逸籠檻之衆鳥恣飛鳴之所如

沈君

理字仲倫吳興人陳尚書吏部郎中駙馬都尉

德章率爾流浪急速骨氣乍高

風神入俗符縱志而失道等潰河與顛木

袁憲字德章陳郡人陳右

僕射

快哉伯武心空手敏古風若遺令範惟允如平郊逸

驥晚景飛隼

毛喜字伯武滎陽人陳吏部尚書

翩翩濟陽茂世希祥任

樸無聞適俗不忘父輕而迅子凜而強

蔡景歷字茂世濟陽人陳度支

尚書子徵字希祥陳中書令

接武隨波雷同野王異磽肥之挺質俱

竹柏之凌霜

顧野王字希馮陳黃門侍郎領大著作

知道則寬疎弛慢無

可取則削凡常病窒塞猶岸陸縱獺艱辛騁力

伏知道昌平人

陳鎮北長史

含茂悠悠荐臻同德迫時季而陵替俱道喪於

翰墨徒麋鹿爲後先非勝負可差忒

謝嘏字含茂陳郡人陳中書令

賀

氏曰朗雖非動人不事筆力猶阻學貧若官游旅泊衣

化風塵

賀朗會稽人陳秘書監

蕭條北齊浩汗仲寶劣充凡正備

法緊草遐師右軍歛爾繇道究千變而得一乘薄俗而

居老如海岳高深青分孤島

劉珉字仲寶彭城人彥英子北齊三公郎中

丈

深孝逸獨慕前蹤至師子敬如欲登龍有宋齊之面貌

無孔薄之心胸

趙丈深天水人後周爲書學博士書迹爲時所重趙孝逸湯陰人隋四門助教

深師右軍逸効大令甚有功業當平梁之後王褒入國舉朝貴胄皆師於褒惟此二人獨負二王之法俱入隋

臨二王之迹人隋則玄平嗣方訛俗名揚彥謙草力浮

間往往爲貨耳

緊循常糟粕右軍之化依稀夫子之牆皆如益星榆之

衆象無月桂之孤光

劉玄平珉之子高道隋贈貞範先生房彥謙清和人司隸刺史

昌

衡跌宕率爾而作雖蔑法而或乖乃由衷而不忤似野

筭成竹長風隕籜

盧昌衡字子均范陽人隋侍中贈司空父道虔子均隋禮部侍郎太子左

庶子我巨唐之膺休一六合而闡幽武功定文德脩高祖

運龍爪陳睿謀自我雄其神貌冠梁代之徽猷

神堯皇帝隴西

李氏諱淵仕隋官至殿內少監右驍衛將軍大丞相封唐王及受禪即位草隋爲唐又王右軍書柱作爪形時

觀者號爲龍爪書高祖師王褒得其妙故有梁朝風格焉

太宗則備集王書聖鑒旁

啓雖躡閭井未登階陞質詎勝文貌能全體兼風骨總

法禮

文武帝諱世民神堯子當貞觀年中
鳩集二王真蹟徵求天下并充御府

武后君臨

藻翰時欽順天經而永保先業從人欲而不顧兼金

天則

皇后沛國武氏士韞女臨朝稱尊號曰大周金輪皇帝
時鳳閣侍郎石泉王公方慶即晉丞相湛之十世孫有
累代祖父書蹟寶傳於家凡二十八人緝成一十一卷
后墨制問方慶方慶因而獻焉后不欲奪志遂盡模寫
留內其本加寶飾錦繪歸還王氏人到於今稱
之右史崔融撰王氏寶章集敘文具記其事睿宗垂

丈規模尚古飛五雲而在天運三光以窺戶

睿宗皇帝
天皇第四

子性淳和好書史尚古
質書法正體不樂浮華開元應乾神武聰明風骨巨麗

碑版崢嶸思如泉而吐鳳筆爲海而吞鯨諸子多藝天

寶之際迹且師於翰林嗟源淺而波細

開元天寶皇帝仁孝慈和兼負

英斷好圖書少工八分書及章草殊異特開元中八分書北京義堂西岳華山東岳封禪碑雖有當時院中

學士共相摸勒然其風格大體皆出自聖心

漢王童年自得書意夙承義獻

守法不二

漢王元昌文皇帝弟

惠文靡倦博好敦勸恨夫有始無

終灰燼成空苟懼存而投閣徒榮沒而昇宮尚可謂梁

園筆壯樂府文雄累聖重光之盛業六書一藝之精工

非所以抑至人之徇己服勇士以雕蟲責繁聲於韶頀

徵艷色於蒼穹者也

岐王元範追冊惠文太子開元皇帝弟時天府圖書為張昌宗竊換

張氏珠後歸薛稷稷沒為王所得初不聞秦後慮為乃盡焚之古樂府文雄者王多能好事有文詞時為歌者

所爰有懷琳厥迹踈壯假他人之姓字作自己之形狀

高風甚少俗態尤多吠聲之輩或浸餘波

李懷琳洛陽人國初時好

為偽迹其大急就稱王書及七賢書假云薛道衡作叙及竹林敘事并衛夫人咄咄逼人猛康絕交書並懷琳之偽迹也有姓謝名道士者能為陶紙書大急就兩本各十紙言詞鄙下跋尾分明徐唐沈范蹤迹烜赫勞茹裝背持以質錢貞觀中勅頻搜尋彼之錢主封以諸閣太宗殊喜賜錢二百疋懷琳乃上別本因得待詔丈林館故在內之本有貞觀印焉頃年在右相若乃出自林甫家後本在張懷瓘處尋轉易與李起居

三公一家面首歐陽在焉不顧偏醜頤翹縮爽了臬黝
糾如地隔華戎屋殊戶牖學有大小夏侯書有大小歐
陽父掌邦禮子居廟堂隨運變化爲龍爲光

歐陽詢長沙人統之

子幼孤陳中書令江總收養書出於北齊三公郎中劉珉官至率更令太常少卿子通亦能繼美拜納言封勅

海公永興超出下筆如神不落踈慢無慙世珍然則壯文

幾而老成與貞白而德鄰如層臺緩步高謝風塵慕煥

嗣聖體多拘檢如得珽玦亂其琬琰

虞世南會稽人荔之子迹居四公之

上官至祕書監贈禮部尚書封永興公子纂孫煥皆能繼世煥授武官在仗宿衛初隋有猛將來護兒子恒濟

皆負才學入唐繼登三世故陸元方所云來護兒
兒把筆虞世南男帶刀言物極則反一至於此也河南

專精克儉克勤伏膺告誓銳思猗丈恐無成如畫虎將

有類於效顰雖價重衣冠名高內外澆漓後學而得無

罪乎

褚遂良河南人兼愛子尚書左僕射拜河南公兼愛名亮東都人

東之効虞疎薄

不逮少保師褚菁華却倍超石鼠之効能愧隋珠之掩

類

陸東之吳郡人宣公子虞氏之出官著作郎薛稷河東人官太子少保

房文昭則雅而

能和穩而不訛精神正氣胃臆餘波若蘋萍異品共泛

中河

房喬字玄齡清和人彥謙子官至司空贈太尉文昭公

殷公王公齊名兼署

大乃有則小非無據騏驎將騰鸞鳳欲翦題二膀而迹

在歎百川而身去

殷仲容陳郡人不害之孫令名之子
奕世工書尤善書額官至禮部郎中

書汴州安業寺額京師義閑業資聖寺東京太僕寺
靈州神馬觀額皆精妙曠古王知敬太原人門傳孝義

工正行善署書與殷殊塗而同歸兼草書弟知慎工圖
畫官至祕書少監當時雙絕與仲容齊肩天后詔一人

署一寺額仲容題資聖知敬題清禪俱爲獨絕洛川長
史德政二賈碑在修行寺東南角即知敬之迹極峻利

豐秀清禪資聖二寺至今識者駐馬往觀
濟度寺即父令名手蹤皆爲後代程式王祕監則首

末全貞尊道重德或終紙而結字或重模而足

道句墨反

濩落風規雄壯氣力播清譽而祖述屢見賞於有識如

曲圃鴻飛芳園桂植

王紹宗瑯琊人修禮子官至祕書少監

虔禮凡草閭

閭之風千紙一類一字萬同如見疑於冰冷甘沒齒於

夏蟲

孫過庭字虔禮富陽人右衛尉曹參軍

張長史則酒酣不羈逸軌神

澄回眸而壁無全粉揮筆而氣有餘興若遺能於學知

遂獨荷其顛稱

張旭吳郡人左率府長史俗號張顛

雖宜官售酒子敬婦

帚遐想邇觀莫能假手拘素屏及黃卷則多勝而寡負

猶莊周之寓言於從政乎何有

後漢師宜官工書嗜酒每遇酒肆輒書於壁顛

觀酒因大售計價償足而減之王子敬以帚泥書壁觀者如市已上皆言旭之可比也

湖山降祉

狂客風流落筆精絕芳詞寡儔如春林之絢采實一望

而寫憂雍容省闈高逸豁達解朝服而歸鄉歛霓裳而

辭闕

賀知章字季真會稽永興人太子洗馬德仁之孫少以文詞知名歷官祕書監白號四明狂客

廣

平之子令範之首姪姹鍾門逶迤王後成都先覺翰墨

泉藪子敬元常得門窺牖侍中簡穆異代同友於孔門

而升堂惜顏子之不壽

徐嶠之東海人廣平太守子浩中書舍人國子祭酒李造隴西

人成都公言侍中簡穆即子雲僧虔

韓常侍則八分中興伯喈如在光

和之美古今迭代昭刻石而成名類神都之冠蓋

韓擇木昌黎人

工部尚書歷
右散騎常侍

赫赫許昌翰苑文房徵前賢而少對當聖

代而難方

田琦雁門人德平之孫工八分小篆署書圖
畫寫洪崖子張氤雲樓并雪木行於世官歷

陝令豫新許等州刺史兼裝背有孫栖梧
尤妙其事常寫武德功臣拜兵部尚書

衛包蔡隣功

夫亦到出於人意乃近天造

衛包京兆人工八分小篆
通字學兼象緯之術官至

尚書郎蔡有隣濟陽人善八分本拙弱
至天寶之間遂至精妙相衛中多其迹

滎陽昆弟內外

光華揮豪美麗自是一家幼弟曰逾丹青大誇信斲玉

而剖石即揀金而披砂

鄭遷及弟邁逾並工八分崔氏
出中書令湜之甥遷官至後儀

尉季弟逾則善畫山水
天寶中知名梁宋

溫良之德書畫兼美誠依仁以游

藝同上善之若水

皇室李權工八分弟樞工小篆姪平鈞亦善小篆魚妙山水並冠絕一時

淮安王神通曾孫權官歷金州刺史樞侍御史平鈞富詞學江陵掾

詩入國風筆超神迹

李將軍世稱高絕淵微已過薛少保時許美潤英粹合

極

右丞王維字摩詰瑯琊人詩通大雅之作山水之妙勝於李思訓弟太原少尹縉文筆泉蘊善草隸書功

超薛稷二公名望首冠一時時議云論詩則曰王維崔顯論筆則曰王縉李邕祖詠張說不得與焉幼弟統有

兩兄之風閨門之內友愛之極

史侍御惟則心優世業階乎摘篆古今

折衷大小應變仰高臺而矚遠俯川陸而必見

史惟則廣陵人

殿中侍御史即諫議大夫白之子白善飛白

通家世業趙郡李君嶧山並驚

宣父同羣洞於字學古今通文家傳孝義氣感風雲

李陽

冰趙郡人父雍門湖城令冰兄弟五人皆附詞學工於小篆初師李斯嶧山碑後見仲尼吳季札墓誌便變化開闔如虎如龍勁利豪爽風行雨集文字之本悉在心胸識者謂之倉頡後身弟澥子騰冰子均並詞場高第幼子曰廣勤學孝義以延安君則快速不滯若懸流得通家之故皆同子弟也

勢三原君則婉媚巧密似垂楊應律

吾舅諱繪彭城人也延安都督煥兄

明若山西平原人京兆三原縣尉大理評事

宋儋李璆擅美中州李師王而

意淺宋祖鍾而體流

宋儋字藏諸廣平人高尚不仕戶部侍郎字文融薦授祕書省校書

郎作鍾體而側戾杖縱跡不副名聞元末舉場中後輩多師之李璆隴西人御史大夫傑之兄子性疎達輕財

欽定四庫全書

卷九

重諾華路緊竭亦有聲於
代爲狄字清李漸所師

員外蕭公名成於薛安西變

體光潤愉悅

蕭公名誠蘭陵人梁之後起家奉禮郎開
元初時尚褚薛公爲之最拜右司員外郎

善造班石文紙用西山野麻及
號州土穀五色光滑殊勝子彭

張氏四龍名揚海內中

有季弟功夫少對右軍風規下筆斯在

張從申長史文
場推第弟從師

監察御史從儀灼然有才從申志業精絕工正行書握
管用筆其於結字緊密近古所無恨歷覽不多聞見遂

寡右軍之外一步不窺意
多揭書闕其真跡故也

呂公歐鍾相雜自是一調雖

則筋骨乾枯終是精神嶮峭其於小楷尤更巧妙

呂向
東平

人聞元初上美人賦忤上時張說作相諫曰夫驚拳脅
君愛君也陛下縱不能用容可殺之乎使陛下後代有

復誅之名而向得敢諫之直與小子爲便耳不如釋之
於是承恩特拜補闕賜綵百段銀章朱紱翰林待詔頻
上賦頌並皆諷諫兼皇太子文章及書官至給事中中
書舍人刑部侍郎文詞學業當代莫比有子曰廣聰利
俊秀有吏才
拜監察御史吾兄則書包雜體首冠衆賢手倦目瞤瞬

息彌年比夫得道家之深旨習閨風而欲仙

家兄蒙字子全司議

郎安南都護

馬家劉氏臨効逼斥安西蘭亭貌奪真蹟如宓

妃遺形於巧素再見如在之古昔

翰林書人劉泰妹歸馬氏

押署則

縱僧權似長松挂劍結體則斂滿騫如磐石卧虎

徐僧權中

山人滿騫富陽人

繁多乃懷充懷珍稀少乃延祖肖祖

唐懷充晉昌人

欽定四庫全書

卷九

姚懷珍武康人陳延祖熾文時有何妥近覩雖正姓名
長安人范曄祖順陽人

美其傲古恨連書於至寶無尺牘之行伍
沈熾文武康人何妥外國

人翊子梁中書侍郎名作當時書證
印驗則王斯胡書
三範太平公主母武氏家玉

印有四胡書今多墨塗存者
董家梵云三範母馱四字也
金鐫篆字少能全一多不

越四國署年名家標望地獨行龜益
龜益
即魏王恭家印並設

寶泉
寶泉書印
貞觀開元文止於二
顯開元
太宗玄宗所用

印
陶安東海徐李所祕
陶安東海
徐祭酒喬之印
萬言

方寸
萬言
詳翰圓所類
軌飛
出出
延王友寶
張氏永保

張氏

張懷
印

任氏言事

任氏
言事

未詳

古小雌文東朝周顓

周顓
東

僕射周顓印

審定竇蒙

竇蒙
審定

議郎竇蒙書印

亭侯龔貴

安國
亭侯

未詳
猗歟

劉鄭

猗歟
劉鄭詳

門承貂珥義仰彭城

彭城
書畫印

金部郎中

劉繹書印

業

周印異

鄧侯圖
書刻章

周昉

相國鄧侯李泌
宣州長史周昉印

或有慙於稽古諒

無乏於雅致 宋虞龢表聞於明皇帝齊簡穆書答於

竟陵王表稱委盡書乃備詳

宋中書侍郎虞龢上明皇帝表論古今妙述正行草

楷紙色標軸真偽卷數無不畢備表本行於世真蹟故起居舍人李造得之齊司空簡穆公瑯琊王僧虔荅竟

陵王子良書敘古善書人評議無不至當藻鑒則梁高本行於世其真蹟今御史大夫黎翰得之

祖巧而未博

武帝時
撰書評

邵陵王博而未至

蕭綸亦
撰書評

庾中庶

失品格拘以文華

梁庾肩吾
撰書品論

傳五兵比亡年廣於職位

梁傅昭撰
書法目錄

名錄編於司馬

隋蜀王府司馬
姚最撰名書錄

善狀集於散

騎

左散騎常侍姚思
廉集善書人名狀

李亞相著藻飾之繁

右御史大夫
李嗣真撰書

品

張兵曹擅習翫之利

率府兵曹鄂州長史張懷
瓘撰十體書斷上中下

考數

公之著稱多博約而竝記余不敏於登高豈虛言而求

備敢直筆於親覩非偏譽於所嗜也 我小司空韋公

曰述職該藝府才同史筆茂族挺生聖朝間出若乃闡

異聞之旨接片善之勤則必忘疲吐握不間風塵所談而改觀成市所寶而增價爲珍小擅聲於自我大推美於其人彼凡百而馳名既往遇此公而其德惟新可謂

千載一時孤標絕倫矣

韋述京兆人尚書工部侍郎

及乎驗德力之

工拙知古今之優劣余稽古而翫能因假手而有說匪徒姓名記錄面目超越相質披文虛空歲月者矣是用相如慕蘭撫新蹟而忘懷豈甘賜也望回抱遐心而結舌終冀乘時出處備展名節其或萃傳巖

鍾紹京南康人
中書令光

欽定四庫全書

卷九

祿大夫聚賢捐金川流海納

而會潁川

家伯諱瓚郤王司馬耽玩達旨固求不匱

歸右史

李造拂鏡旁通傾心善價

而入補闕

席巽安定人右補闕心專務得家業或遺祭酒徐浩

法則

道存微求非利

翰林之尋繹

張懷瓘兄弟懷璵盛王府司馬並翰林待詔俱好無厭亦能臆斷

烏臺

潘履慎榮陽人監察御史克遵能事採玩芳猷

粉署之敦閱

蔡希寂濟陽人金部郎中

玩學潤身假借盈篋

欣給事之道弘

族兄紹給事中志弘雅道不倦虛求

仰議郎之

區別

家兄鈇思窮源增輝改觀

韓生委輸

韓滉潁川人給事中委質慮遠推誠道博

滕子

擁決

滕昇歛州婺源縣令取捨若流通利泉藪

張氏旁求

懷瑾海陵人爲郭州司馬利無推斥

道在陸家胥悅

陸曜吳郡人巷輯前芳事窮先志

釋肫超彼岸

東京福先寺僧

良拙新羅人俗姓林氏
遇捐衣鉢逸冠儕流

梅仙行無轍

高志宜渤海人同
官尉氣合古風力

知能

溫播金聲

溫晁太原人國子簿
悉心景慕徒衆博求

崔含冰潔

崔曼倩
清和人

郭縣尉浩汗經
管見如不及

若驚陳趙

陳閭潁川人陳王府長史趙
徵明天水人或志敦習學或

自悅古能皆
既之無數也

賈勇徐薛

徐守行東海人監察御史薛邕
河東人郎中或推古招致或究

能踰拔並求
之不已也

關郭雙奮飛

關雋隴西人郭暉太原人潘
或規規耽好或楚楚傳寫

袁兩傾竭

潘淑會稽人袁明陳郡人
或披尋洽道或耽藉樂貧

簪纓布素申道間

設既輻輳而川流並觀光於後哲速珠玉之無脛可得

略而言曰長安則穆聿

聿咸陽隴右人少以販書爲業
後至德中因告訴徵搜古迹并

欽定四庫全書

卷九

強括石泉公家則天皇后所述書功
白身受金吾長史改名祥乘危射利

王昌

遼東人詞

藻

其源葉豐

括州人貌恭性僻

田穎

長安人志凡纖滯

委其軀必拾遺市

駿懷寶飛鳬洛陽則杜福

河南人論熱行巧

劉翌

洛陽人節苦心廉

窮

彌固齊光

河南人道寡業微

趙晏

河內人智專別識

樂忘劬

此四人洛陽販書者

皆誇目動利實有若無詩不云乎匪斧語有之曰反隅

若或徵數子之運用甘千里之殊塗則我雞犬而無來

無往子衣裳而不曳不裾成一家之憬彼睽四海之友

于

言通貨利

事符道因心與日親幾變仄律涉歷冬春互爲

賓主往返周秦左翊吾兄業窮幽遠

名錫同州別駕

龍興張揖

道契真淳

與潘淑獻書拜官
今任龍興縣尉

雅興閑關以隨扣古風開

卷以襲人不然者何窮獨而恣怡悅何市朝而貪隱淪

言尚
往來

衆美森然往哲來賢一朝而星羅入眼百代而雲

披及肩身已沒兮若休迹遺芳而可傳彼金印玉璽豐

碑貨泉蟲篆制而八分開矣正隸興而藁草行焉不可

量乎所覩又何極乎備宣若乃流譽前代効績當年錄

軍機而羽括鷹隼述國命而發揮貂蟬通親友以感節

啓咨謀以聞天接武波委嗣芳鱗連則余不讓於賦頌
敢分媿而別妍恃乎幼好而晚知之乃至熟也曲察而
直言之斯無愧與將拭目而衆利輕言入掌而百憂俱
寫其藤苔縑縠側理蜀幅花麻黃絢緇赭紺綠淪壓而

邇蠹亡文

蓄非其人雖
邇朝亦朽蠹

保持而遠完緘卷

處之得地雖
遠古亦完全

上智所以懸解

直

中庸所以交戰

疑

取迷伊地貽笑鄙

賤則有烏絲縹首紫繭露面好丹時更悲素色變狀玄
豹之霧隱規雕虎之風扇雖置水彌旬移裝屢徧益深

沉於質直乃容易於覽見嗟乎捨不疑於古踈

高聳

取憑

假於俗眩

眩惑

誘淺情於末興肆凡賞而流眄何其妄哉

寧知立法而虧真作德而還淳忘情是悅代有其人

言定

是非必也易背以時

時在正夏

受彩無欺敏洽和之妙道得潤

軟之成規

用麪調適候陰以成

疎密苦樂殊形異宜

厚薄完盡

上約下

豐始增末裨

接上下前後例

沽將實名位充合離

改拆署拘餘地

或附

卷均端足使其夷

薄而靈者

或鳴砧妥帖然後呈姿

厚而完者

探

尋源流志逸肥遯緝合翦截躬勞不悶明齊短長閭決

分寸誠怱怱於或躁祛恨恨之遺恨至如虹縈絲帶驚舞錦標青間綾文出之衣表檀心鼈首金映銀絡舒囊貌妍撫卷香作多此飾類又難詳備

並言檢討裝背也

若乃見

稀意欲雖可棄而崑山片玉翫久厭充雖可寶而紈扇秋風競捨茲而易彼誇視審而聽聰或芟穢於匿迹或喪真於矜工夥哉耳誤眇矣目窮因既原乎識量遂懸別其淹通已分流而在茲徒並驚而爭雄

言申博易

假使作

僞心勞亂真首出昧目童幼摧殘紙筆終令君子棄瑕

以拔材壯士斷腕以全質期補勞於得喪勵採葑於始
卒子猷之竹在焉曷可無其一日

言務弘道

夫喻大始於事

卑方崇極於類聚況物著公器賞推善主異清白而非
弓裘豈孫謀而紹宗祖仰如堯禪舜舜命禹道必貴乎
聲同天無親而德輔歸可保於授受靡自私而禦侮故
知乖其趨者則密戚而心捐合其軌者則舉儲而掌傳
亮玉白之利未望吾徒之義先

先言傳付後紀樂成以終也

至其罷

琴閑堂散衷虛牖閱新連之卷軸傾舊滿之樽酒暢懷

古而遺形荷逢時以濡首炎涼所寄偃仰無咎煙積孤
松春過五柳想薜蘿而在眼狎鸞鳳而盈手善隣得朋
知我益友暗遺名利卧度卯酉遂志願兮苟若斯生可
憑兮死不朽雖金翠溢目陶匏聒耳徒潤色於多歡實
無階於競美賢賢易色勿樂有喜茅居食貧陋巷飲水
誓將敦素業而畢世振清風而何已亂曰資樂道子善
莫大佐玄覽子寄所賴芝蘭滿室兮遺美芳朋友忘言
兮古人會想賢玩蹟子儼如在史冊悠悠子幾千載

唐竇蒙注述書賦語例字格

吾弟尚輦君字靈長翰墨師張王文章凌班馬詞藻雄
贍草隸精深平生著碑誌詩篇賦頌章表凡十餘萬言
較其巨麗者有天寶所獻大同賦三殿蹴鞠賦以諷興
諫諍爲宗以匡君救時爲本帝乃咨爾可編筴書中使
王人榮曜戚里龍章鳳篆寵錫儒門及乎晚年又著述
書賦總七千四百六十言精窮旨要詳辨祕義無深不
討無細不聞徵五典三墳考九丘八索詩騷禮易文選

詞林猶不盡所知故別結語立言曲申幽奧一字一句
數義旁通尚輦君學究天人才通詁訓注解分析皆憑
史傳注有未盡在此例中意有未窮出此格上凡古今
名哲正文呼字尊貴長老各言其親或取便引官或因
言稱爵句則兩字三字五言四言而於其以之間或六
或八改時革命之際舉一相從慮學者致疑仍施朱點
發此語之理例別有字格存焉凡一百二十言并注二
百四十句且褒且貶還同謚法披文感切撫已崩摧手

迹宛然如向來之放筆天才卓爾成千載之分襟考義

銘心言筴在目一杖先折痛貫肝腸兩眼既枯哀纏骨

髓

忘情

鵬鷃向風
自成騫翥

天然

鷺鴻出水
更好儀容

質朴

天仙玉女
粉黛何施

斲磨

錯綜雕文
方申巧妙

體裁

一舉一措
盡有憑據

意態

四翔動靜
厥趣相隨

不倫

前濃後薄
半敗半成

枯槁

欲北還南
氣脈斷絕

專成

直師一家
今古不離

有意

志立乃就
非工不精

正

衣冠蹈拖
若止若行

行

飢履趨銷
如步如驟

草

電掣雷奔
龍蛇出沒

章

草中隸古
蹴踏擺打

神

非意所到
可以識知

聖

理絕名言
潛心意得

文

經天緯地
可大可久

武

回戈挽弩
拉虎擎豹

能

千種風流
曰能

妙

百般滋味
曰妙

精

功業雙極
曰精

古

除去常情
曰古

逸

縱任無方
曰逸

高

超然出衆
曰高

偉

精彩照射
曰偉

老

無心自達
曰老

喇

超能越
妙曰喇

嫩

力不赴
心曰嫩

薄

闕於員
備曰薄

強

筋力露
見曰強

穩

結搆平
正曰穩

快

興趣不
停曰快

沈

深而意
遠曰沈

緊

團合密
緻曰緊

慢

舉止閑
詳曰慢

浮

若無所
歸曰浮

密

間不容
髮曰密

淺

涉於俗
流曰淺

豐

筆墨相
副曰豐

茂

字外情
多曰茂

麗

體外有
餘曰麗

宏

裁制絕
壯曰宏

實

氣感風
雲曰實

輕

筆道流
便曰輕

瘠

瘦而有
力曰瘠

踈

違犯陰
陽曰踈

拙

不依緻
巧曰拙

重

質勝於
文曰重

纖

丈過於
質曰纖

貞

骨清神
正曰貞

豔

少古多
今曰豔

峻

頓挫穎
達曰峻

潤

旨趣調
暢曰潤

險

不期而
然曰險

怯

下筆不
猛曰怯

畏

無端羞
澀曰畏

妍

逶迤擗
打曰妍

媚

意居形
外曰媚

訛

藏鋒隱迹曰訛

細

運用精深曰細

熟

過猶不及曰熟

雄

別負英威曰雄

雌

氣候不尼曰雌

飛

若滅若沒曰飛

爽

肅穆飄然曰爽

動

如欲奔飛曰動

成

一家體度曰成

禮

動合典章曰禮

法

宣布周備曰法

典

從師約法曰典

則

可以傳授曰則

偏

惟守一門曰偏

乾

無復光輝曰乾

滑

遂乏風采曰滑

馱

絕波瀾驚
絕曰馱

閑

孤雲生
速曰閑

拔

輕駕起
殊曰拔

放

流浪不
窮曰放

鬱

勝勢鋒
起曰鬱

秀

翔集難
名曰秀

束

興致不
弘曰束

穠

五味皆
足曰穠

峭

峻中勁
利曰峭

散

有初無
終曰散

質

自少妖
妍曰質

魯

本宗淡
泊曰魯

肥

龜臨洞穴
沒而有餘

瘦


鶴立喬松
長而不足

壯

力在意
先曰壯

寬

疎散無
檢曰寬



御定佩文齋書畫譜卷九